



ル 5
2537
6



門儿呂
號 2537
卷 20-6

日下書院卷九

宮室七

宣宗八年四月二十六日
上命教儒輔導文字之臣
死於林少者楊少者楊少者
李時地後者少者黃平白
武臣日勤者少者伯卿
學侍御游者少者死侍御
大散之東而南者死侍御
皆皇太子侍御也

日下舊聞卷九

宮室七 明四

宣宗八年四月二十六日上命勲舊輔導文學之臣遊
西苑翰林則少傅楊士奇楊榮少詹事王英王直侍讀
學士李時勉錢習禮時少保黃淮來自退休與焉 翰林

楊士奇賜游西苑詩序宣德八年四月上以在廷文
武臣日勤職事不遑暇逸特勅公侯伯師傅六卿文
學侍從游觀西苑偕行凡十有五人自西安門入循
太液之東而南觀新作之圓殿改作之清暑殿二殿
皆皇上奉侍皇太后宴游之所降而登萬歲山至廣
寒殿而仁智介福延和三殿及瀛洲方壺玉虹金露

之亭咸得遍造已而中官傳奉上帝命賜黃封之酒御
厨之珍爵數行時久未雨忽陰雲東來微雨沾席倉
庚如簧和鳴不已相與引滿勸酬盡醉而出賦詩若
干首

李里集

王直記畧六月七日陪少師少保及諸學士於太液
池上焚三朝實錄草本詔許近萬歲山觀金元遺跡
中官引自圓殿後度石橋橋中空二丈許用一大舟
實其中以通行者既度入山門門有三中爲御路衆
從左右門入山皆奇石叠成相傳金人取宋艮岳石
爲之至元增飾加結構焉山趾兩傍皆有門躡石級
而上至半有三殿中曰仁智左曰延和右曰介福獨
廣寒殿在其頂又有瀛洲方壺玉虹金露四亭在延

和介福之後昔皆窮極侈麗今猶有可觀者山右之
半有廢井深不可測中人云下與海通有蛟螭焉山
下一石曰慶雲奇峰萬變蓋艮岳之絕奇者又有康
干石康干國名石乃松木入河水浸漬久而成者其
木理宛然凡諸殿宇皆仍其舊未嘗修治我朝列聖
恭儉之德於此可見矣觀畢賜宴山下盡醉而歸王
文端公文集

李賢賜遊西苑記天順己卯首夏月上命中貴人引
賢與吏部尚書王翱數人遊西苑入苑門卽液池蒲
葦芰荷翠潔可愛循池東岸北行花香襲人行百步
許至椒園中有圓殿金碧掩映四面豁敞曰崇智南
有小池金魚游戲其中西有小亭臨水芳木匝之曰

玩芳又北行至圓城自兩掖洞門而升上有古松三
株中有圓殿曰承光西有長橋跨池下過石橋而北
山曰萬歲怪石參差爲門三自東西而入有殿倚山
左右立石爲峯以次對峙四圍皆石磴折而上並列
三殿中曰仁智左曰介福右曰延和至其頂有殿當
中曰廣寒左右四亭在峰之頂曰方壺瀛洲玉虹金
露下過東橋轉峰而北有殿臨池曰凝和二亭臨水
曰擁翠飛香西隅有殿用艸曰太素殿殿後草亭畫
松竹梅於上曰歲寒門左有軒臨水曰遠趣軒前草
亭曰會景循池西岸南行有屋池水通焉以育禽鳥
有亭臨水曰映輝又南行有殿臨池曰迎翠有亭臨
水曰澄波東望山峰倒蘸於太液波光之中又西南

有小山至則有殿倚山山下有洞洞上有巖橫列密
孔泉出迸流而下曰水簾水聲泠泠然潛入石池龍
昂其首口中噴出復潛繞殿前爲流觴曲水左右危
石盤折爲徑山畔有殿翼然至其頂一室正中四面
簾櫳欄檻之小奇峰回互下轉山前一殿深靜高爽
殿前石橋極精巧左右有沼沼中有臺臺外古木叢
高鳥鳴上下至於南臺林木陰森過橋而南有殿面
水曰昭和門外有亭臨岸沙鷗水禽如在鏡中

集

古懷

韓雍賜遊西苑記天順三年四月賜公卿大臣以次
遊西苑遂由西華門而西入西苑門卽太液池之東
南岸也乃折北循岸而行至椒園園內行殿在叢樹

中殿之北有釣魚臺南有金魚池又北行至圓殿觀
燈之所也歷階而登殿之基與睥睨平古松數株其
高參天其西以舟作浮橋橫亘池面北則萬歲山在
焉北度石橋登山山在池之中磊石爲之山之麓以
石爲門門內稍高有小殿琴臺碁局石牀翠屏分布
森列峰有最奇者名翠雲上刻御製詩沿西坡北上
有虎洞呂公洞仙人庵又上有延和有瀛洲有金露
皆殿名瀛洲之西湯池之後有萬丈井深不可測由
金露折而東上絕頂則廣寒殿也下至玉虹又下而
南至方壺至介福皆與延和諸殿相對峙而方壺瀛
洲則左右廣寒而奇特者也又下至山之東麓過石
橋復折北循岸數百步至九間殿門外繫五六小舟

稍北有船房苦龍船其中又北行數里至北闌上橫
小亭釣竿數十線餌具備垂之清流沿池北岸而內
復折而南有蓄水禽之所二皆編竹如牕下通活水
啟扉以觀鳥皆翔鳴又南至浮橋西回殿對岸也復
出而南至小教場又西南至小山名賽蓬萊入門有
殿殿前一大池中通石橋東西二小閣立水中橋南
有娑羅樹殿後復有三殿其階益上益高至頂則與
萬歲山相望下至第三殿之前蓄水作機瞰其下有
水簾洞洞之中作金龍口中噴水水從前殿基下陰
渠之內過至於殿前鑿石爲曲渠復作龍頭於其西
水至出龍口旋繞而東可以流觴坐久之乃循故道
出東南行至小石橋橋上有亭過而上崇坡爲南臺

臺有行殿殿之南門外臨流作小軒少頃太監邀入殿之東廡赴所賜宴酒既芳冽杯復連引遂大醉折北出西苑門已晡時矣

韓襄毅公集

彭時賜遊西苑記西苑在宮垣西中有太液池周千餘里池中駕橋梁以通往來橋東為圓臺臺上為圓殿殿前有古松數株其北即萬歲山山皆太湖石堆成上有殿亭六七所最高處廣寒殿也池西南又有一山最高處為鏡殿乃金元時所作其西南曰南臺則宣廟常幸處也

可齋筆記

葉盛賜游西苑記天順三年四月六日有旨賜游西苑先飯於左順門東北廊訖趨右順出西華西上西中西苑四門北入椒園至行殿殿枕太液池下脈如

鏡出北行至圓殿由東城門入上殿殿前古松極奇怪又置翠屏岩郭公磚木變太湖石從西城門下北至太液歷御橋再北至萬歲山由西路入山徑傍有仙人老虎洞抵絕頂入廣寒宮兩傍圓亭東曰玉虹西曰金露兩亭下次第又各兩殿東曰方壺次曰介福西曰瀛洲次日延和山半坪間有仁智殿舊址自東路出山至九間殿過黃船廠過北闌口行殿又西從湖岸折而南至養牲房所養皆珍禽經虎城至小山子名賽瀛洲前後左右皆有殿中兩傍有水閣山頂之殿狀如廣寒殿前有水出腰垂如珠簾然流至石池西流從石龍口吐出復湫流山下殿前鑿石為流觴曲水水折流至東池復南入湖中過橋亭至南

臺行殿前有石礮直階下數十步至水中是爲釣磯
前所歷覽皆上游幸所也 水東日記

嘉靖十五年五月召輔臣李時禮官夏言武定侯郭勛
汎舟西苑帝以五日率先朝故事汎舟西苑特召時言
勛侍行先命太監韋霏賜以艾虎彩索牙扇等物帝至
御龍舟命時言一舟勛一舟自芭蕉園歷玉簫金鰲橋
至澄碧亭頒賜御肴又命楫人蕩槳近龍舟顧問已而
賜宴無逸殿乃還 翰林記

夏言御舟歌御舟北臣舟南積翠堆雲山似玉金鰲
玉竦水如藍臣舟南御舟北雲龍會合良及時魚水
君臣永相得 桂洲集

李默遊西內記季夏十六日望西安門舍騎步入過

仁壽宮直北隙地初築親皇壇殿用前詹事霍韜議
也殿東西北上爲永福萬春諸宮正南爲門者三日
仁壽宮門門外西南數十步築神祇壇蓋仿周禮王
社爲之直東爲帝社坊凡駕臨亭特駐此坊東北爲
無逸殿殿南爲幽風亭上著幽風圖記揭亭中出門
南行西望黍菽盈疇趙常侍導而西槐柳多至數圍
蓋遼時物北行松間隱隱見岡阜至則小軒峙其前
又前甃石爲九曲黃河軒北石假山也頂列銅池六
皆貯水池旁多穿孔竇下注洞口注中爲龍勢若噴
吐前爲園池龍盤其間駕幸則瀉銅池從孔竇迸落
名水晶簾山上有梳粧樓遺址舊傳爲遼后遊處自
橋至此地皆以文磚乳花石雜甃之常侍導出一門

循勝而東南見省耕亭額南並稻畦可二十畝中有
池方廣十丈環置桔槔引池灌焉復導自東小門出
則湖堤萬柳中也緣堤稍南樹益密林端望見昭光
殿常侍曰此兔兒山也稍北行常侍別去時夕陽半
落湖心波光閃爍荷葉盡舒花皆紅白葭菼蒼然有
鳥巢其末啾唧出蘆葦間湖東列數亭爲艤舟處亭
外爲西苑門殿闕參差可歷歷指出時已昏黑矣群

王樓棗

嚴嵩賜遊西苑詩序泛金海觀於廣寒山蕩舟持楫
者皆中使水光蕩漾遠近亭臺隱現金碧交輝若身
造瑤池弱水之間鈴山堂集

嘉靖十三年九月西苑河東亭榭成上親定額天爲房

北曰飛靄亭迎翠殿前曰浮香亭寶月亭前曰秋輝亭
昭和殿前曰澄淵亭後曰耀臺陂臨漪亭前曰水雲榭
西苑門外二亭曰左臨海右臨海亭北開口曰湧玉亭
河之東曰聚景亭改呂梁洪之亭呂梁擬前曰儀金亭
翠玉館前曰擷秀亭萬歲山後曰玩芳亭明典禮志

王九思午日從遊西苑應制詩蘭宮桂殿翠微中鳳
輦宸遊引上公鶯語巧隨歌曲細榴花嬌映御筵紅
長秋揆日分絲縷侍女承恩戲角弓魚藻萬年同宴
鎬甘泉欲賦未能工漢陂集

文徵明秋日再經西苑詩內苑清秋宿露晞盈盈日
采動金扉松間翠殿團華蓋天外銀橋入紫微錦纜
稀游青雀暗瑤波無際白鷗飛彤牆高柳無人折時

見宮中一騎歸 甫田集

西苑池水既堅以紅板作枕床四面低欄亦紅色旁僅容一人上坐其中諸璫於兩岸用繩及竿前後推引往返數里 天啓宮詞注

上數同中官泛輕舸於西苑手操篙櫓去來便捷乙丑端午用絳繒小舟首尾龍形上親持刈同內侍劉思源高承壽溯流俄而風起雲霧四塞舟覆二璫溺死太監譚敬急往扶駕出水 同上

陳棕詩琉璃波面浴輕舸子飛來若畫圖認着君王親蕩槳滿堤紅粉笑相呼風掠輕舟霧不開錦鱗吹裂綵帆摧須臾一片歡聲動捧出真龍水面來 天啓宮詞

啓宮詞

崇禎十五年春上游西苑召內閣五府六部都察院錦衣衛諸大臣從先於上舟行禮畢賜饌分舟而游日晡復登上舟謝乃退 崇禎遺錄

往時宮中出游西苑有大耍外小耍外之名賞賜無算臨晚用金銀豆灑地聽內豎爭拾取為笑樂之例崇禎悉罷之易以胡桃紅棗等物 客燕雜記

西苑門迤南向東曰灰池曰樂成殿曰水碓水磨 燕史左臨海亭右臨海亭在西苑門外嘉靖二十三年五月建 宮殿額名

樂成殿涵碧亭浮玉亭俱萬曆三十年七月添扁 同上從芭蕉園南循水過西苑門半里有肺瀉池水轉北別為小池中設九島三亭一亭藻井鬪角為十二面上貫

金寶珠頂內兩金龍並降丹檻碧牖盡其後麗中設一
御榻外四面皆梁檻通小朱扉而出名涵碧亭其二亭
制少樸梁檻惟東西以達厓際東有樂成殿左右楹各
設龍床殿後小室亦設龍榻皆宣皇游歷處也殿右有
屋設石磨二石碓二下激湍水自動田穀成于此春治
故曰樂成 西元集

馬汝驥詩金隄迴北拱寶殿樂西成春急奔湍上梁
危駕石行池龍蟠九島苑鳥下層城帝豫因民事長

楊愧頌聲 同上

文徵明詩太液東來錦浪平芙蓉小殿瞰虛明碧欄
蘸影雙龍臥綠水浮渠九島輕漾日金鱗堪引釣拂
天翠柳亂聞鶯激流靜看飛輪轉天子無爲樂歲成

莆田集

陳沂涵碧亭詩苑入黃金塢橋迴碧樹灣龍池觀九
島鰲禁覓三山溜轉雲車急花深月殿閒從來人罕
至御榻在中間 拘虛集

河之西曰昭和殿曰紫光閣曰陽德門曰萬壽宮曰旋
磨臺卽兔兒山也曰無逸殿曰幽風亭 燕史

從樂成殿度橋轉南一徑過小紅亭二百餘步林木深
茂內有殿曰昭和皆黃屋傍有水田村屋先朝嘗於此
閱稼 西元集

南臺在太液池之南上有昭和殿北向踞地頗高頰眺
橋南一帶景物其門外一亭不止八角柱拱攢合極其
精麗北懸一額直書耀臺坡三字降臺而下左右扉宇

各數十楹不施牕牖又其北濱池一亭額曰湧翠則御駕登龍舟處燕都遊覽志

馬汝驥南臺詩灌木晴湖合高花午榭移堯茨元不剪周稼欲先知雨露懸蓬逕風雲護竹籬九重歡豫地髣髴見龍旗西元集

文徵明詩青林迤邐轉迴塘南去高臺對苑牆暖日旌旗春欲動薰風殿閣書生涼別開水榭親魚鳥下見平田熟稻梁聖主一遊還一豫居然清禁有江鄉甫田集

歐大任南臺詩西內風煙異南臺見水田艱難曾稼穡淳朴自山川農舍朝炊裏江鄉夕照前穀蠶勞斧藻函雅定同傳旅燕稿

王嘉謨題臺坡詩春湖泛綠水華林積清樾靈臺自孤峙昆池更不竭戰鵠隨風舞恩魚向波沒藉草弄煙虹傍撓采薇蕨鼠積龍虎文日漾龜鼉窟崇儉陋雕墻荒遊笑溟渤願言飲澄波于焉絕天伐薊丘集

崇禎壬午九月召閣部諸臣入對明德殿出西華門傍西海子北行過椒園折而東逾園殿度御橋步至明德門外頃之召入明德殿前上坐殿門內外張御幄左右各張黃幕置宴榻十二張對畢諸臣分東西就黃幕下入席席設大花瓶插雞冠花酌用金葵花杯大如盃花有瓣中心花點甚多四傍刻日御前欽賜下刻日萬曆壬寅年銀作局造席各饌盒十五別有殺十器而蔬至二十二器菓五品湯酒各三巡宴畢謝恩出上駕已動

旋登紫光閣看文書閣甚高敞樹陰池影葱翠萬狀一
佳景也卽同趨過閣下沿西海行至萬壽宮策馬過南
臺越小橋有涵碧亭曲水環之又激水爲水碓如江南
樣下馬徘徊久之遂出

怒書

萬壽宮者文皇帝舊宮也世宗初名永壽宮自壬寅從
大內移蹕此中已二十年至四十年冬十一月之二十
五日辛亥夜火大作凡乘輿一切服御及先朝異寶盡
付一炬相傳上是夕被酒與新幸宮嬪尙美人者于貂
帳中試小烟火延灼遂熾此後卽下詔雲南買諸寶石
及紫英石屢進不當意仍責再買如命戶部尙書高燿
求龍涎香經年僅得八兩蓋諸珍煨燼已盡無一存者
故索之急耳尙美人致火事未知果否至嘉靖四十五

年八月命拜未封宮御尙氏爲壽妃贈其父臣爲驃騎
將軍右軍都督僉事而同封貴妃文氏乃從敬妃進封
者其父止得指揮同知則恩禮輕重可知矣封妃之日
距聖誕僅二日上春秋恰周一甲子蓋亟尊貴之以侑
大慶上觴云

野獲編

嘉靖壬寅宮變宮婢楊金英欲斃上手熟寢以繩束喉
不絕有張金蓮者知事不就走告皇后往救獲甦乃命
太監張佐高忠捕訊得同謀者楊玉香邢翠蓮姚淑翠
楊翠英關梅秀劉妙蓮陳菊花王秀蘭八人又有徐秋
花鄧金香張春景黃玉蓮數人詔悉磔之于市上卽移
御西苑萬壽宮不復居大內萬壽本成祖皇帝舊宮也
至辛亥萬壽宮災上乃暫御玉熙宮宮近西華門孔道

列屋僅兩層工部尙書雷禮言玉熙宮湫隘且地近外非可久御萬壽宮係皇祖受命重地宜及時營繕嚴嵩欲諷上還大內具言三殿初成工料缺乏萬壽未宜興復上不悅命太常卿徐璠督工

世廟識餘錄

萬壽既災公卿大臣皆欲上還大內而不敢嚴嵩測上之不欲歸大內也因請幸南內上不懌謂南內故英宗皇帝居之是且欲幽我徐文貞請以三殿大工之餘木趣治之以百日爲期且請才與工部臣雷禮計之百日而上果就其命尙寶丞璠閱視亦上意非公請也

關然

西宮再建欽定正宮前堂曰萬壽宮後寢曰壽源宮宮門曰萬壽門左門曰曦福右門曰朗祿後門永綏含祥

成瑞仍舊後過廊左曰永康門右曰永順門宮亭名大元殿名凝一門名衍慶殿東本四宮四十年已建萬春宮至是三宮欽定萬和萬華萬寧其西四宮欽定仙禧仙樂仙安仙明東西二街門扁七門隨西長街向東四名自南起常寧常和常喜常輝向西金寧若舊三門自東起攸順攸利金瑞後二墻門迎祉納康壬戌四月立帝社帝稷坊牌安砌宮門墻拓造西連房壬戌六月十三日承祐殿成七月十八日祐祥殿祐寧殿板屋成十月三日建洪應雷宮

古和稿

嘉靖四十五年四月紫極殿壽源宮成百官上表稱賀

世宗實錄

西苑宮殿自十年辛卯漸興以至於壬戌凡三十餘年其

曰下舊聞

卷九

七

間舛造不輟名號已不勝書至壬戌萬壽宮再建之後
其間可紀者如四十三年甲子重建惠熙承華等殿寶
月等亭既成改惠熙爲元熙延年殿四十四年正月建
金籙大典于大元都殿又謝天賜丸藥於太極及紫皇
殿此三殿又先期舛者至四十四年重建萬法寶殿名
其中曰壽憇左曰福舍右曰祿舍則工程甚大各臣俱
沾賞至四十五年正月又建真慶殿四月紫極殿之壽
清宮成在事者俱受賞則上已不豫矣九月又建乾光
殿閏十月紫宸宮成百官上表稱賀時上疾已亟雖賀
而未必能御矣自世宗升遐未匝月先撤各宮殿及門
所懸扁額以次漸折材木穆宗欲以紫極宮材重建翔
鳳樓因工科都給事中馮成能力諫而止未歷數年惟

存壞垣斷礎而已蓋茲地爲文皇帝潛邸舊宮因而入
紹大位且自永樂以來無論升遐卽嬪御無一告殞於
此者故上意爲吉地而安之禁籞初啓命爲仁壽殿他
如洪應雷壇上有禱必至如凝道雷軒上晝日恒御皆
無跡可問惟清福殿則整麗如故外門曰仙芳曰丹馨
內亭曰錦芳曰翠芬流泉石梁頗具幽致且松柏列植
蒙密蔽空又百卉羅植于庭開花時則今上亦時一游
幸蓋其地又與萬壽宮稍隔故得免焉 野獲編
世廟居西內事齋醮一時詞臣以青詞得寵眷者甚衆
而最稱上意者無如袁文榮煒董尙書份然皆誕妄不
典之言如世所傳對聯云洛水元龜初獻瑞陽數九陰
數九九九八十一數數原乎道道通元始天尊一誠有

感岐山丹鳳兩呈祥雄聲六六六三十六聲聲
聞于天天生嘉靖皇帝萬壽無疆此袁所撰最爲時所
贈矣他文可知矣時每一舉醮無論他費卽赤金亦至
數千兩蓋門壇扁對皆以金書屑爲泥凡數十盃其擦
筆中書官預備大管泚筆令滿故爲不堪波畫狀則袖
之又出一管凡訖一對或易數十管則袖中全亦不下
數十銖矣吾鄉談相以此得貳卿且致富云同上
嘉靖間供事內廷奉元修者宰臣嚴分宜以衰老得賜
腰輿至八十再賜肩輿其同事而恩稍下者則夏文愍
翟文懿俱賜乘馬二公因私用腰輿上聞以爲僭心術
之夏被禍翟被逐已胎於此矣同上
撰文諸臣初時不過一二宰輔既而郭勛崔元以勳爵

入陸炳朱希孝以緹帥入李春芳董份以學士入人數
既增直房有限得在列者方有登仙之羨不復覺其湫
隘且房俱東西向受日良苦惟嚴分宜最後得另建西
南一所甚寬潔且命賜白金筵爲飲食器及他食物甚
備分宜處之凡十餘年分宜逐卽以居徐華亭徐徙居
其內亦五年嚴之晚節以屢出直見踈徐懲其敗每遇
上命到閣理事或賜沐至家輒云戀念聖躬起居不忍
暫捨而出上以是益憐之高新鄭最後入直其辨胡給
事疏中云所居凡四層十六楹最敞則亦分宜直房之
亞矣同上

張少師孚敬李少保時方少保獻夫翟殿學鑿於癸巳
歲賜游萬歲山諸處有春游倡和集戊戌上奉慈寧泚

西苑召郭翊公勛李夏二少傅顧少保從後居西苑齋
宮四臣與分宜相不時宣召至夜分多寓宿內時未有
直廬也已亥始賜無逸殿左右廂分居多應制供青詞
之作今列于後太師郭翊公勛太師朱成公希忠太保
崔都尉元太傅仇威寧鸞鄔都尉景和少保方安平承
裕太保陸都督炳太保朱都督希孝已上勲武臣少師
夏殿學言少傅翟殿學鑾少師嚴殿學嵩少保費尙書
宗宮保張閣學治少傅李殿學本少師徐殿學階歐宗
伯德宮保李太宰默宮保王宗伯用賓少保吳宗伯山
少傅袁殿學焯宮保嚴殿學訥少保李殿學春芳少保
郭殿學朴尙書高殿學拱諸公前後許乘馬出入獨嚴
以年老待乘腰輿已未以八十特賜乘肩輿此希特之

典也 鳳洲筆記

嚴嵩萬壽宮頌赫赫皇明膺運握符於烈太祖金陵
闕都成祖繼天燮伐大定駐蹕全燕奠鼎凝命周宅
鑄京殷居亳邑履重馭輕四方之極有宮穹穹禁苑
之西名曰仁壽高朗軒夷實惟斯宮肇基帝跡創始
鴻圖貽謀燕翼爰二百年我聖龍翔受命中興于二
聖有光以聖繼聖克復其始迺禘斯宮迺慰迺止金
梁駕漢玉棟干虹王氣榮光鬱鬱葱葱皇曰我祖明
德斯肇予寶嗣之曷循曷紹累厚增高重基疊構特
易隆名嘉進萬壽壽考維祺自天之祐承以五福範
衍箕疇康寧好德申命用休百祿承次坤儀用彰安
貞之吉應地無疆南闕端門麗于陽德南門名法天

行禮四奧咸光耀左門名 秩秩寅賓出日亦有輝
右門名 素月澄璧陰陽之精左右互弼皇居皇處
匪曰豫佚景綜萬幾咸釐庶績志加窮闔念軫民食
亭翼幽風殿峙無逸南闕穀壇以祀于稷北鄰桑壇
后歲親蠶德如關雎教形葛覃允矣風化世于二南
維昔農桑王業之自皇宅于茲肇修苑事分條建規
補弊典滯皇心翼翼齋明莊栗昭事上帝靈威可質
賜福降祺百神效職衍于列祖享祀一堂衣畫袞龍
珩瑤瑤天眷聖皇而安而室俾爾熾昌俾爾多益
長發其祥螽斯蟄蟄天眷聖皇壽萬年綏以繁祉
受祿于天天耀景星地溢醴泉元龜薦瑞朱草呈鮮
四方賀焉四夷服焉我皇御曆曷有極焉微臣稽首

敢獻斯篇 鈔山堂集

皇甫冲西苑卽事曉日曛曛照御堤君王身在大庖
西雲邊鐘磬和仙樂日下旂幢雜綵霓侍從詔看元
鶴舞中官勅賜紫騮嘶長生殿上長明火不數秦王
祀寶雞 華陽集

蔣山卿宮詞君王親著紫霞裳白玉冠簪八寶光夜
半碧壇星月冷九天仙樂下鸞皇碧殿瑤壇禮上清
桂華涼露浸銀屏雙雙玉女扶青案跪啓琅函諷道
經 南冷集

蔡羽卽事詩金水荷花接綺軒石渠銀鑰掌中闌西
崑學士封麻散斜日猶開左闕門碧雞朱鷺羽毛鮮
小殿芙蓉貼水圓昨夜百花風信急御溝新藻有紅

泉林屋集

升耕秋興詩銅龍春闕曉光寒金水橋橫白玉欄見
說漢皇求大藥故邀王母到長安黃金夜獻成竈
青鳥朝翔太乙壇不是歲星陪帝輦蟠桃誰奉殿中
歡朔野山人集

李裴嘉靖宮詞沉水龍涎徹夜焚桂宮芝館結祥雲
壇前纜布諸天位苑外先催學士文玉貌終年侍禁
闈每逢時節賜金緋君王不愛纖腰舞裁作雷壇拜
斗衣泥金檢玉祝長生萬國封章止進呈月滿西宮
更漏永九天風落步虛聲小車飛曳向元都翠羽金
翹笑自扶玉竦橋邊長日市內瑯爭買大秦珠李太史集

王世貞西城宮詞新傳牌子賜昭容第一仙班雨露
濃袋裏相公書疏在莫教香汗濕泥封五雷壇上雷
一聲海子開口雨縱橫祈靈驗後催傳賞馬上朱提
玉手擎芙蓉新樣紫霞冠細擁珠琲小鳳團一片香
烟叢裡出玉真朝罷簇迴鑾色色羅衫稱體裁舖宮
新例一齊開菱花小樣黃金合昨夜真人進藥來兩
角鷓青雙筋紅靈犀一點未曾通自緣身作延年藥
憔悴春風雨露中梨園子弟髻如霜十部龜茲九部
荒奴殺女冠諸侍長大羅天上奏霓裳兪州山人集
歐大任西苑詩日上觚稜照綵旂西宮夜醮火初收
滄池波色青門曉長樂鐘聲碧樹秋名岳采芝諸使
出中天築館萬靈遊漢家詞客頭將白汾水年年望

歐虞部集

張元凱春日遊西苑詩宣室臨西苑靈臺對籍田宮
鶯迷綠雨廐馬飲清川柳引金堤直松含玉殿圓先
皇受盞處寂莫鏤春燭

桂枝山房集

又西苑宮詞肅將上帝祀明堂寶鼎昭回日月光九
獻不須歌舊曲詞臣昨已竭芝房秋殿清齋正受盞
迎和門外立諸姬大官不進麒麟脯御饌惟供五色
芝陳詞瘞玉奏鈞天西苑宮墻近籍田水旱恐煩祠
后土未央深處好祈年夕烽千里照甘泉一紙降魔
勅已傳急遣六丁乘羽駕火輪金甲淨幽燕靈藥金
壺百和珍仙家玉液字長春朱衣擎出高元殿先賜
分宜白髮臣通天臺上接三台景命重臨清醮開拜

舞不同郊社禮科儀一一聖人裁香通紫氣靄晴空
靈貺神休集聖躬垂拱萬年如一日禮臣何必議青
宮金符寶笈護雲英鸞鶴行將入上清拜受玉霄龍
鳳簡元陽象一字分明蓬萊方丈可梯航勾漏丹砂
近寄將昨貯銀山高幾許試持玉尺殿中量瑞氣祥
雲薄海濱遠藩齊獻百千春進來白鹿高于馬馴擾
金堦不畏人

同上

張鳳翼西苑志感詩芙蓉別殿未央西煙氣晨飄雉
尾齊出洛神龜將寶籙銜花馴鹿遶金闈近臣拾翠
供元草使者乘驄訪碧雞一自六龍天上去幾回清
禁政璇題

處實堂集

黃克晦西苑詩雷殿清虛太液秋至尊多在望仙樓

樹深宮闕東西合月出星河上下流
麟圃紫芝春擘擘兔園白鹿曉
啣啣軒轅鼎在龍髯斷露箔風繁
不上鈞

黃孔昭集

沈一貫望西城宮殿詩莫殿重開寶曆春
竹宮長鑠屬車塵烟霞自護祈年閣
星斗曾傳醮夜辰帳裏流蘇閒甲乙
爐中寒火憶庚申茂林松柏蕭蕭老
無復相如賦大人

喙鳴集

汪文盛西苑詩萬年枝上露華清
百子池邊月色明宮草經秋猶自碧
君王御輦不曾行

白泉集

從南臺遠西堤過射苑有兎園其中
疊石爲山穴山爲洞東西分徑盤紆
而上至平砌又分繞至巔布甃皆陶
埏雲龍之象砌上設數銅甕灌水
生池池前玉盆內作

盤龍昂首而起激水從盆底一竅轉
出龍吻分小洞由大明殿側九曲注
池中殿傍喬松數株參立百藤縈附
于上復懸蘿下垂池邊多立奇石一
名小山子西元集小山在仁壽宮之西
入清虛門磴道盤屈甃甃皆肖小龍
文疊石爲峰巉巖森聳元氏故物也
中官云元人載此石自南至燕每石
一準糧若干俗呼折糧石近歲重葺
一亭上扁曰鑒戒亭亭中設櫺貯書
上至以備覽山頂曰清虛殿俯瞰都
城歷歷可見山腰累石爲洞刻石肖
龍水自龍吻出噴灑若簾其前爲曲
流觀甃石引水作九曲流觴又南爲
瑤景翠林二亭中架石梁通東西兩
池金鱗游泳大者可尺許

鈴山堂集

大仙都殿嘉靖二十八年三月更大道殿前有大道門

入清虛門曰清虛殿鑿戒亭俱嘉靖十三年八月建又有曲流觀翠林瑤景二坊旋坡臺嘉靖二十八年三月更仙臺萬曆九年七月添築方亭其上四十年九月榜曰迎仙亭又有福巒祿渚二坊臺上牌額七一玉光二光華三華輝四輝真五真境六境仙七仙臺宮殿額名嘉靖四十五年二月造御懋等殿于大道殿果園中世宗實錄

即旋磨臺天啓乙丑重陽車駕臨幸鐘鼓司印執板唱洛陽橋記攢眉黛鏤不開一闕次年復如之官人相顧以其近不祥也天啓宮詞注

文徵明詩漢王游息有離宮瓌闕朱扉迤邐通別殿春風巢紫鳳小山飛澗駕晴虹團雲芝蓋翔林表噴

壑龍泉轉地中簡朴由來堯舜事故應梁苑不相同甫田集

廖道南清虛殿詩峻極丹青上清虛碧海前扶桑先見日若木遠含烟絕島移雲石明河瀉瀑泉仰看元象轉身在蔚藍天元素集

陳仲詩美人眉黛月同彎侍駕登高薄暮還共訝洛陽橋下曲年年聲繞兔兒山天啓宮詞

朝元館嘉靖四十五年五月建萬曆二十八年五月毀顯陽殿萬曆二十九年五月建景德殿萬曆二十八年十月建宮殿額名

大光明殿門東向日登豐曰廣福曰廣和曰廣寧二重門曰玉宮曰昭祥曰凝瑞前殿則大光明殿也左太始

殿右太初殿又有宣恩亭饗社亭一陽亭萬仙亭後門
曰永吉左安右安中爲太極殿東總宗殿西總道殿其
帝師堂積德殿壽聖居福真懋祿仙室五所毀於萬曆
三十年後有天元閣下曰闡元保祚同上

嘉靖三十六年十一月大光明殿工成世宗實錄

嘉靖十年上于西苑隙地立帝社帝稷之壇用仲春仲
秋次戊日上躬行祈報禮蓋以上戊爲祖制社稷祭期
故抑爲次戊內設幽風亭無逸殿其後添設戶部尙書
或侍郎專督西苑農務又立恒裕倉收其所獲以備內
殿及世廟薦新先蠶等禮蓋又天子私社稷也此古史
冊所未有自西苑肇興尋營永壽宮于其地未幾而元
極高元等殿繼起以元極爲拜天之所當正朝之奉天

殿以大高元爲內朝之所當正朝之文華殿又建清稷
殿爲行香之所每建金錄大醮壇則上自躬至焉戶人
撰青詞諸臣皆附麗其旁卽閣臣亦晝夜供事不復至
文淵閣蓋君臣上下朝真黜斗幾三十年與帝社稷相
終始至穆宗紹位不特永壽宮爲牧場并西苑督農大
臣亦裁去矣野獲編

西苑農務凡占地五頃有餘役農五人老人四人騾夫
八人每人日支太倉米三升仍復其身耕畜則從御馬
監支糧草先是工部蓋農舍築牛宮造倉廩順天府歲
進穀種比其獲也戶部以本年所入之數上聞蓋自夏
言皇后親蠶之說行于是農桑並舉以復邃古神農之
政未幾親蠶禮卽廢而農務則終世宗之世焉同上

嘉靖十年八月帝御無逸殿之東室曰西苑舊宮是朕文祖所御近修葺告成欲于殿中設皇祖位祭告之祭畢宜以宴落成之又曰無逸之作雖所以勸農而勤學之意亦在其中今用宴以落成之經筵日講官俱與仍各進講七月詩無逸書各一篇世廟聖政紀要

嘉靖二十一年上元上御陶風亭賜朱孝忠等五臣宴

觀燈

肅皇外史

世宗初建無逸殿于西苑翼以陶風亭蓋取詩書義以重農務而時率大臣游宴其中又命閣臣李時翟鑾輩坐講陶風七月之詩賞賚加等添設戶部堂官專領稽事其後日事元修即於其地營永壽宮雖設官如故而上上所創春祈秋報大典悉遣官代行撰青詞諸臣雖

係直於無逸之旁廬而屬車則絕跡不復至其殿惟內直工匠寓居彩畫神像並裝潢渲染諸猥事而已至甲辰年翟鑾生二子中式被議鑾辨疏以日直無逸為辭時上奉道已虔惟稱上元高元及元威元功而鑾唯樸尚舉故事上大怒褫逐之此後并殿亭舊名無齒久者矣世宗上賓未期月西苑宮殿悉毀惟無逸則至今存至尊於西成時問亦御幸內臣各率其曹作打稻之戲凡播種收穫以及野籩農歌徵糧諸事無不入御覽蓋較上耕籍田時尤詳云今上甲申乙酉間無逸燼于火輔臣申吳縣等奏皇祖作此殿欲後世知稼穡艱難其慮甚遠非他游觀比宜以時修復上深然之今輪奐尚如新也對獲編

打稻之戲駕幸無逸殿鐘鼓司扮農夫媪婦及田畯官吏徵租納稅等事燕史

樊深駕幸無逸殿命輔臣進講無逸幽風頌維彼陶唐奄有萬方乃命神禹于理于疆爰及成周農桑疋吏忠哉元輔克善其謀書記無逸艱難可稽君子所知小人所依詩載幽風農桑不廢無衣無褐何以卒歲惟我聖明志切于耕遠宗唐帝近比周成駕幸無逸命及元老文武成周農桑是寶何以言之詩書在卽何以講之幽風無逸乃聖乃神乃武乃文功崇惟志業廣惟勤克勤于邦克儉于家天心克享其何以加含物化光德合無疆超彼東周嘉靖殷邦西田集李廷機無逸殿箴巍巍紫殿于此禁中維皇游衍吳

天與通天之立君豈曰爾逸四海萬幾一日二日逸則必淫勞則能思治忽存亡端繫于斯是以君道無逸爲貴一心無逸百祥攸萃精神日強事功日起可以延年可以致理在昔聖人受命享國安於泰山壽于箕翼令名鴻號聲施至今何以致然無逸乃心忠哉姬旦左右成王卻顧長慮懿訓用彰叙述列辟自商及周德有勤逸祚有短修遺編斯存萬世不易南面著龜治安藥石我皇撫運累洽重熙匪曰未盛所慮平陂我皇廸德剛健正中匪曰未至所慮初終功在一簣治慎無虞無逸作所實爲良圖勿謂旣聖逸則滅德勿謂旣治逸則叵測勿謂定爾惟逸乃離勿謂咸賓惟逸乃貳宴安可懷得無妨政耽樂可從得

無伐性雖當遊觀母忘儆飭念及小民心存稼穡操而競業去而怠荒天休滋至萬壽無疆 李文節公集

姜應麟無逸殿箴維辟承天日有萬幾事起于忽患生于微惟彼哲王勵精弘化若踐春冰若馭泛駕几公且遠思令猷爰陳無逸入告嘉謀勉勉我皇願思其義自強不息克勤罔替母謹大廷而懈深宮既虔厥始必保其終母謂予明視於無形母謂予聰聽於無聲母謂天與命不易哉母謂人歸民罔常懷小臣進規治道在邇母怠母荒夙夜敬止 考槃齋言

夏言無逸殿西壁詩睿藻承遺訓農歌啓聖衷千秋所無逸七月詠幽風帝學詩書在神謀制作同光照文祖業原上有新宮 桂洲集

嚴嵩無逸殿直舍和夏少師韻燈火通宵晃禁廬霧臆雲閣近宸居瑞烟入座香浮苑寒色窺簾月到除緱嶺乍聞丹鳳吹穀城先訪赤松書歸來未向人間說天語新承燕對餘 鈴山堂集

國初無親蠶禮嘉靖九年勅禮部曰耕桑重事古者帝親耕后親蠶以勸天下自今歲始朕親耕皇后親蠶其具儀以聞于是大學士張璁等請于安定門外建先蠶壇準先農壇制旁設採桑壇倣籍田制其別殿如南郊齋制少減其數卽齋旁起蠶房爲浴蠶所皇后採桑三條後三宮夫人採五條列侯九卿夫人採九條仍擇良婦受桑浴蠶于內以終事詔如議行詹事府詹事霍鑿言皇后出難越宿且郊外別建蠶室則宮嬪命婦未見

蠶事勢難久行乞擇近地便戶部亦言安定門外水瀆不通無浴蠶所初禮部議于皇城內西苑中有太液瓊島之水且唐制亦在苑中宋亦于宮中從禮部議便上命築親蠶壇于安定門外十年三月改築壇于西苑仁壽宮側壇高二尺六寸四出陛廣六尺四寸東爲採桑壇方一丈四尺高二尺四寸三出陛鋪莞如壇制臺之左右樹以桑東爲具服殿北爲蠶室又爲從室以居蠶婦設蠶宮署于宮左置蠶宮令一員丞二員擇內臣謹恪者爲之十四年皇后親蠶于內苑

明典禮志

嘉靖九年三月皇后親蠶點差采桑命婦一十七人會昌侯孫果妻顧氏玉田伯蔣榮妻黃氏靖遠伯王瑾妻常氏宣城伯衛鏞妻張氏成山伯王洪妻周氏兵部尚書李成勛妻袁氏禮部尚書文淵閣大學士翟鑾妻劉氏戶部尚書梁材妻楊氏禮部尚書李時妻何氏刑部尚書許瓚妻李氏都察院右都御史汪鉉妻程氏禮部左侍郎嚴嵩妻歐陽氏刑部左侍郎聞淵妻方氏工部右侍郎蘇民妻王氏通政使司通政使張妻楊氏國子監祭酒許誥妻陳氏翰林院學士顧鼎臣妻朱氏

嘉靖祀典

世宗更定祀典遂行皇后親蠶禮當時俱咎夏貴溪逢迎上意御史馮恩至謂后親蠶于郊不可示後世然夏說未可非也周禮天官內宰中春詔后率內外命婦始祭蠶於北郊漢禮儀志皇后祀先蠶以中牢文帝景帝元帝俱詔皇后親蠶魏黃初中依周禮置壇于北郊晉

與高齊俱置高壇皇后親祭俱躬蠶後周因之隋置壇
宮北三里皇后以太牢祭唐置壇在長安宮西苑中貞
觀顯慶先天乾元間皇后親蠶皆先有事于先蠶壇儀
具開元禮宋用高齊制后親享先蠶貴妃亞獻昭儀終
獻其神則祠天駟星次則黃帝元妃西陵氏漢加苑祿
婦人寓氏公主後又益以蠶女馬頭娘之屬要皆有所
本嘉靖之制雖未盡合古然農桑並舉固帝王所重也
訂獲編

皇甫汭蠶室成詩蠶館開周典鸞輿扈漢儀棘堦春
窈窕桑沼晝漣漪爾獻夫人日衣明上帝時娥媼御
王母玉佩降瑤池皇直勳集
周祚西內詩鳳輦朝陽合鸞輿大內通聖朝典禮樂

行殿按蠶宮周氏家藏集

夏言西苑詩龍池西畔苑堦橫碧樹朱亭曉望明歲
歲君王深駐輦百花香裏看春耕北郊已復親蠶禮
內苑仍開獻繭宮繖出素絲方玉雪織成元袞炫山
龍昭和殿枕兔兒山春日曾留聖主歡翠蓋龍駒出
西苑霜毫玉管賦祇壇西苑門前渡彩舫龍池烟水
漲冥冥碧山故繞承光殿綠樹新藏寶月亭桂洲集
金海橋之北曰玉熙宮曰承華殿曰元僖殿曰寶月亭
曰清馥殿曰騰禧殿燕史
玉熙宮二坊曰熙祥熙瑞後殿曰清仙宮東壽祺齋西
祿祺齋又有鳳和居鸞鳴居仙輝館仙朗館宮殿額名
神廟設玉熙宮選近侍三百餘員學宮戲駕陞座則承

應之劉榮印其一也 燕史

玉熙宮在西安裏門街北金鰲玉竦橋之西明愍帝每宴玉熙宮作過錦水嬉之戲一日宴次報至汴梁失守親藩被害遂大恟而罷自是不復幸玉熙宮矣 金鰲退

食筆記

清馥殿前有丹馨門錦芳翠芬二亭嘉靖十一年三月建 宮殿額名

嚴嵩賜遊清馥殿詩十里宜春苑金堤覆綠楊水涵瑤殿碧花簇錦亭芳馳道通長樂離宮接建章微臣一何幸留賞沐恩光 鈴山堂集

禧殿覆以黑琉璃瓦明武宗西幸悅樂伎劉良女遂以歸居此俗呼為黑老婆殿 金鰲退食筆記

胡績宗擬古詩驚喜君王至西華夜啓扉後車三乘載得美人歸 烏鼠山人集

按康陵載劉良女歸號曰夫人及南巡日帝期以中途召之夫人脫簪予帝以示信帝騎過盧溝亡之大索不得也行至臨清念夫人召之以不見簪不往帝不獲已兼程抵潞河載夫人偕南寺觀旛幢列鎮國公號復繫以名夫人每得並書嘉靖初納南京給事中王紀之言俾盡撤去然夫人在途常諫帝游獵非專以色固寵者明之諸陵皆有妃從葬而康陵獨無之惟二妃葬于金山無姓氏殆亦為尊者諱也

金海橋之東北巋然若山者曰廣寒殿俗云遼后梳粧樓也河上有乾祐閣俗云北臺是也高八丈一尺廣十七丈天啓二年毀平之就其地爲嘉樂殿其門曰延景門其西則內教場也稍南有坊曰衆音引祥橋其東則北開口也無史

瓊島在太液池中從承光殿北度梁至島有巖洞窈窕磴道紆折皆疊石爲之其巔古殿結構翬起周迴綺牖玉檻重階而上榜曰廣寒之殿相傳遼太后梳粧臺今欄檻殘壞內金刻雲物猶彌覆檉棟間下布以文石傍一榻亦前朝物殿前舊有四亭曰瀛洲方壺玉虹金露今惟遺址耳西元集

餘文皆壘石而成者石磴陰洞古檜喬松縈紆蔭鬱隱然仙府也頂有廣寒殿四隅各有亭左曰玉虹曰方壺右曰金露曰瀛洲山半有三殿中曰仁智東曰介福西曰延和下臨太液池山上常有雲氣浮空網縕五彩變化莫測戴司成集

瓊華島土取自塞外輟耕錄西軒客譚可稽也石移自吳嶽明宣宗廣寒記可證也涿水亭雜識

謝鐸瓊華島詩蓬海分明在眼中暖雲高捧玉芙蓉春陰欲下清虛殿朝彩先浮最上峰瑤管聲中迷去鶴金根影裏護飛龍夜來雨過知多少試向東郊問老農桃溪淨業

黃佐入瓊華島尋遼后粧樓青梧飄素秋烟霜異昏

且所忻天地肅適意山水翫眇默循玉闕威遲度金
澗長虹浮大川積翠橫天半瑤甍拂台斗綺牕瞰雲
漢風起雲嵯峨日耀樹零亂昔聞青娥妝今見碧草
蔓采蓮無緩歌握蘭有遺歎淋池翔玉鳧芳洲宿朱
鴈蹇予及朋好羨爾遊波瀾緬懷巖桂叢徘徊歲將
晏 秦泉集

文徵明瓊華島詩海上三山擁翠鬢天宮遙在碧雲
端古來漫說瑤臺迥人事寧知玉宇寒落日芙蓉烟
裊裊秋風桂樹露團團勝遊寂寞前朝事誰見吹簫

駕綵鸞 甫田集

阜城北苑中有廣寒殿瓦甍已壞榱桷猶存相傳以爲
遼蕭后梳粧樓成祖定鼎燕京命勿毀以垂鑒戒至萬

曆七年五月忽自傾圮其梁上有金錢百二十文蓋鎮
物也上以四文賜余其文曰至元通寶按至元乃元世
祖紀年則殿創于元世祖時非遼時物矣 太岳集

永樂七年三月車駕至北京命學士胡廣諭德楊榮金
幼孜修撰王英等從遊萬歲山 翰林記

金幼孜和胡學士春日陪駕遊萬歲山詩鳳輦遊仙
鳥春殘花尚濃龍紋蟠玉砌鶯語度瑤宮香霧浮高
樹祥雲覆碧空五城雙闕外宛在畫圖中巖巖凌丹
闕迢遙跨紫臺龍香浮日動鳳蓋拂雲來疊嶽參差
出層崖隱映開幽情不可極臨眺重徘徊 金文靖公
集

胡儼次韻胡學士陪駕游萬歲山詩鳳輦宸游日祥

雲夾道紅香風傳別殿飛翠繞行宮徑轉千岩合波
迴一鏡空忽看鸞鶴起聲在半天中閣道雲爲幄仙
山玉作臺更無凡迹到只有異香來柳拂金輿度花
迎寶扇開太平多樂事扈從得徘徊 胡奈酒集
王洪和胡學士從遊萬歲山詩飛旆臨丹壑鳴鑣陟
紫臺日邊雙鳳下雲裏六龍來寶殿臨空敞瑤筵就
水開共誇青鑠客陪宴栢梁回 毅齋集
宣德三年上奉皇太后遊西苑上親掖太后輿上萬歲
山奉觴上壽太后悅酌酒飲上且曰今天下無事吾母
子得同此樂皆天與祖宗之賜也天下百姓皆天與祖
宗之赤子爲人君但能保安百姓使不至於饑寒則吾
母子斯樂可永遠矣 宣宗實錄

宣德三年三月上命尙書蹇義內閣學士楊士奇楊榮
等十有八人同遊萬歲山許乘馬將從者二人登山周
覽復賜登御舟泛太液池中官拏舟網魚有旨人賜御
釀玉醅一甌飲既復命乘馬游小山 翰林記
楊榮泛太液池作太液春波暖承恩泛綵舟輕盈蘭
棹發蕩漾玉虹流簾影移宮樹茶香出御甌此中多
勝景况是從宸遊 楊文敏公集

宣德七年七月上登萬歲山坐廣寒殿召翰林儒臣傳
命周覽都畿山川形勢既畢上曰茲山茲字元順帝所
日宴遊者也豈不可感守臣叩首曰殷之跡周之監也
翰林記

宣宗章皇帝御製廣寒殿記萬歲山在宮城西北隅

皆奇石積疊以成左右二道宛轉而上飛樓複閣廣
亭危榭東西拱向最高者爲廣寒軼雲霞納日月天
下之偉觀莫加於此矣永樂中朕侍皇祖太宗文皇
帝萬幾之暇燕遊於此天顏悅懌顧茲山而諭朕曰
此宋之艮嶽也宋之不振以是金不戒而徙于茲元
又不戒而加侈焉睹其處思其人夏書所爲傲峻宇
雕牆也吾時游焉未嘗不有傲於中昔唐九成宮太
宗亦因隋之舊去其汰侈而不改作時資宴游以存
監省汝將來有國家天下之任政務餘閒或一登此
則近而思吾之言遠不忘聖賢之明訓國家生民無
窮之福矣朕拜稽受命書不云乎皇祖有訓詩不云
乎儀刑文王肆嗣位以來凡事天愛民一體皇祖之

心敬而行之洞洞屬屬罔間夙夜比登茲山顧視殿
宇歲久而掩遂命工修葺永念皇祖儼如在上敬以
所受大訓筆而勒諸石旣以自省亦以昭示我子孫
於億萬年 御製集

八年四月上謂楊士奇楊榮曰朕於宮中所在皆置書
籍楮筆今修葺廣寒清暑二殿及瓊華島欲於各處皆
置書籍卿二人可於館閣中擇能書者取五經四書及
說苑之類每書錄數本分貯其中以備觀覽 實錄
楊士奇從游西苑詩廣寒宮殿屬天家晚從宸游駐
翠華瓊液總頒仙掌露金支皆插御筵花棹穿萍藻
波間雪旗颭芙蓉水上霞身世直超人境外玉盤親
捧棗如瓜 東里集

皇甫汭廣寒宮登眺詩寶閣凌霄建珠牕映日開月
臨疑桂宇露灑卽銅臺山悉圖嶠入池猶象漢廻倚
粧花屢發窺舞鳥能來傾國元因色勞民豈但財地
隨元運改棟與美人催殿監良非遠秦宮亦可哀聖
朝留故蹟皇覽實休哉皇甫司勳集

郭正城詩苑西古殿鬱崔嵬輦路雲封晝不開樹老
千年能化石池穿億劫有殘灰虹橋依舊通牛渚露
瓦分明見鳳臺門外琉璃田萬傾我皇時駕六龍來
黃離草

李裴都城雜咏西宮白日靜波流小殿玲瓏夾御溝
花樹重重春爛熳游人偷上洗粧樓李太史集
王世貞宮詞傳呼京兆進春牛百戲魚龍曼衍遊雜

杳香車看不見好登遼后洗粧樓并州山人稿

乾佑閣建自明萬曆年間在太液池之北高八丈一尺
廣十七丈磴道三分三合而上倒影入水波光蕩漾如
水晶宮闕天啓時毀之卽其處爲嘉樂殿其門曰延景
門再西曰親軍內教場也金華退食等記

萬曆二十九年六月新築大內乾德殿御史林道楠董
其工至三十年四月道楠上言三殿兩宮高不過一十
二丈今臺高八丈一尺加以殿宇又復數丈其勢反出
宮殿之上禁中豈宜有此不報神宗實錄
萬曆三十三年八月更乾德殿爲乾德閣天啓元年八
月毀之四年五月添建嘉豫殿宮殿額名

太液西隄出兔園東北臺高數丈中作團頂小殿用黃瓦左右各四楹接棟稍下瓦皆碧南北垂接斜廊懸級而降面若城壁下臨射苑背設門牖下瞰池有馳道可以走馬乃武皇所築閱射之地

西元集

正德十一年二月命右都督張洪監督團營西官廳復指揮僉事神周官代洪管勇士營時江彬許泰皆以邊將得幸上好武特設東西兩官廳于禁中視團營東以太監張忠領之西以秦領之周嘗以罪坐謫附秦洪亦得進用未幾益以劉暉皆賜國姓爲義子四鎮兵號外四家彬兼統之上又自領闖人善騎射者爲一營謂之中軍晨夕操練呼譟火礮之聲達于九門浴鐵文組照耀宮苑上親閱之名曰過御言望之如錦也諸軍悉衣

黃鼠甲中外化之雖金緋盛服亦必加此于上秦及周等遮陽帽上飄靛染天鵞翎以爲飾貴者飄三英次二英兵部尚書王瓊得賜一英冠以下教塲自謂殊遇焉

武宗實錄

李夢陽內教塲歌雕弓豹韃騎白馬大明門前馬不下竟入內伐鼓大同耶宣府耶將軍者許耶武臣不習武奈彼四夷西內樹旗皇介夜馳鳴礮烈火嗟嗟辛苦

空齋集

馬汝驥平臺詩曲臺通太液複道肅鈞陳虎亦歸營久龍光繞禁新柏梁閒日月蓬閣接天人漢帝崇文化賡歌奉紫宸

西元集

陳沂平臺詩海氣生華蜃天光落彩虹穹階曾帝陟

丁下集

卷九

三

飛觀有仙通燕七何年召周民不日攻禁西傷舊事
七校指離宮 拘虛集

文徵明詩日上宮墻飛紫埃先皇閱武有層臺下方
馳道依城盡東面飛軒映水開雲傍綺躡常不散鳥
窺仙仗去還來金華待詔多頭白欲賦揚媿不才
甫田集

嘉靖三十年上更定營制命改舊內教場名曰內敝營
欲以團操內使次年二月工部請營建祀所并營舍中
立一臺備御視上乃遣朱希忠告廟尙書歐陽必進祭
司工之神 世宗實錄

北闌口亭嘉靖十三年六月更湧玉亭二十二年三月

更匯玉渚西龍淵亭萬曆三十年七月建會景亭嘉靖
二十二年三月更龍澤亭萬曆三十年七月更龍湫亭
宮殿額名

嘉靖二十二年四月新作雷霆洪應殿成 世宗實錄

雷霆洪應之殿有壇城轟雷軒嘯風室噓雪室靈雨室
耀電室清一齋寶淵門靈安堂精馨堂馭仙次輔國堂
演妙堂入聖居俱嘉靖二十二年三月懸額 宮殿額名
上召禮部尙書夏言於無逸殿論之曰西海子以午日
奉兩宮游宴止行望祀宜特建祠宇言退疏言海子出
源西山繞出甕山後匯爲七里灤東入都城潞爲積水
潭南出玉河入大通河轉漕亦賴其利比之五祀其功
較大禮宜特祀請於闕口湧玉亭後隙地建祠詔可

嘉靖十五年建金海神祠于大內西苑湧泉亭以祀宣靈弘濟之神水府之神司舟之神二十二年改名弘濟神祠 國朝典彙

金海祠以仲春秋上壬日用事遣太常卿行三獻禮祝辭曰粵稽瓊源其來舊矣自彼玉泉之委發茲太液之流潤澤禁垣功亦彰矣茲惟仲春秋敬修時祀用報靈貺神其流福以惠我生民尙享 嘉靖祀典

夏言苑中寓直紀事詩湧玉亭前夜泛舟碧荷香靜雨初收遙看北岸紅烟裏水殿珠簾盡上鈎 桂洲集

天順四年九月新作西苑殿亭軒館成苑中舊有太液池池上有蓬萊山山巔有廣寒殿金所築也西南有小

山亦建殿于其上規制尤巧元所築也上命卽太液池東西作行殿三池東向西者曰凝和池西向東對蓬萊山者曰迎翠池西南向以草繕之而飾以堊曰太素其門各如殿各有亭六曰飛香擁翠澄波歲寒會景映輝軒一日遠趣館一日保和工成上臨幸召文武大臣從遊歡賞竟日 英宗實錄

正德十年七月重修太素殿殿舊規堊飾茅覆實與名稱新制務極華侈凡用銀二十餘萬兩役軍匠三千餘人歲支工米萬三千餘石鹽三萬四千餘斤他浮費及續添工程不在此數 武宗實錄

嘉靖癸卯夏四月新作雩人成其地滙以金海帶以瓊山規模闕備地位肅嚴前爲雩禱之壇後爲太素殿以

奉祖宗列聖神御齋館列峙臨海為亭曰龍澤曰龍湫東為弘濟祠經始昨秋至是而告成焉 鈴山堂集

太素殿前有溥門嘉靖四十三年七月更殿名為壽源旁有正心齋持敬齋後有歲寒亭嘉靖二十二年三月更五龍亭五亭中曰龍潭左曰澄祥曰滋香右曰湧

瑞曰浮翠二坊南曰福渚北曰壽岳三洞上隆壽中玉華下仙游其素左素右二門天啓七年六月塞之三洞

天啓元年毀 宮殿額名

會景亭南有屋數連通池水以育禽鳥舊名天鷲房有亭曰映暉曰澄碧凝和殿在池東西向二亭臨水曰湧

翠飛香迎翠殿在池西東向臨水有亭曰澄波明嘉靖時更建浮香寶月二亭 餘錄退 筆記

映暉亭嘉靖二十二年四月更騰波亭三十五年五月

更滋祥亭萬曆三十年七月更香津亭澄碧亭嘉靖二

十三年六月更飛靄亭三十年五月更湧福亭萬曆三

十年七月更騰波亭凝和殿嘉靖二十三年六月更惠

熙殿四十二年三月更元熙殿會景亭嘉靖二十二年

三月更龍澤亭萬曆三十年七月更龍湫亭迎翠殿即

承華殿浮香亭嘉靖十三年五月建三十年六月更矣

蓉亭寶月亭嘉靖十一年三月移建延年殿嘉靖四十

三年三月建 宮殿額名

嘉靖四十三年三月元熙延年殿成四月以元熙承華

寶月三殿亭工完賜工部尚書雷禮等銀幣 世宗實錄

北開口東岸日船屋冬藏龍舟之所 燕史

瑤華島東北過堰有水殿二一藏龍舟一藏鳳舸舟首尾刻龍鳳形上結樓臺以金飾之又一浦藏武皇所造烏龍船岸際有叢竹蔭屋浦外二亭橫出水面西元集自瓊華島東麓過石橋由陟山門折而北循岸數百步有水殿二深十六間藏龍舟鳳舸金齋退食筆記方船制長十丈九尺濶二丈九尺五寸為方形嘉靖十七年於禁苑成造以備御用置塢居之龍鳳船肖龍鳳形飾以五采置塢二處居之采蓮船三係司苑局於西湖采鮮所用者水部備考

馬汝驥詩鳳殿臨瑤水龍舟鎖白雲樓臺疑上漢簾鼓憶橫汾池豈昆明鑿波猶太液分昔年浮萬里蘭

桂賦心紛西元集

文徵明詩列殿陰陰水竇連漢家帝子有樓船蘭橈桂楫曾千里錦纜牙檣憶往年汾水秋風空落日隋堤楊柳漫青烟今皇別有同民樂不遣青龍漾碧川甫田集

歐大任龍舟浦蕭鼓中流發秋風散浦烟淋池新樂府汾水舊樓船賞勝觀濤日遊非習戰年甘泉思扈

從回首濯龍川歐虞部集

承光殿甃砌如城墻以磴道分上之上有樓閣古松此乾明門西也曰御河橋即金海橋橋之東岸再南曰五雷殿即椒園也亦名蕉園再南則西苑門矣蘇史承光殿在太液池上圍以甕城殿構環轉如蓋一名圓殿中有古栝數百年物也甫田集

承光殿一名圓殿在太液池東圍以甕城池有大石橋
二其一跨海子東西曰金鰲玉竦其一跨瑤華島之南
曰堆雲積翠而圓殿則介其南殿前有古檜一株傳爲
金時遺植蒼勁天矯若虬龍之擎空真有神物呵護之
者自嘉靖以來每歲給楸俸米若干石燕都遊覽志
承光殿嘉靖三十一年更乾光殿宮殿額名
積翠坊下有圓殿中大松偃蓋青葱萬曆年已枯死封
之官都督踰年復生客燕雜記

廖道南承光殿詩承光臨太液長日水雲封橋帶流
虹渚門迎積翠峰楸間學士草壇畔大夫松寶藏來
淵海時瞻紫氣濃元素集

文徵明詩小苑平臨太液池金鋪約戶鑲盤螭雲中

帝座飛華蓋城上鈎陳繞翠旗紫氣曾迴雙鳳輦青
松猶有萬年枝從來清蹕深嚴處開盡碧桃人未知
甫田集

太液池在西苑中南北亘四里東西二百餘步東瞰瑤
華島東南有儀天殿殿前老檜一株盤回若偃蓋中架
長橋兩端立二坊西曰金鰲東曰玉竦天氣清明日光
滉漾清徹可愛戴司成集

太液池在子城西乾明門外周遭凡數里其源自玉泉
山合西北諸水流入都城德勝門滙爲積水潭亦名海
子至北安門水關流入西苑人呼西海子燕都遊覽志
永樂十五年十一月壬申金水河及太液池水凝具樓
閣龍鳳花卉之狀上賜群臣觀之成祖實錄

宣德八年三月少保黃淮辭歸上宴餞之于西苑太液池親灑宸翰製詩送之仍賜金織衣一襲

大政記

宣宗章皇帝御製詩天香早折仙桂枝筆花五彩開鳳池蓬萊之仙直奎壁近侍九重天咫尺永樂聖人臨御初鞠躬稽首陳嘉謨仁宗監國文華殿左右謀猷共群彥朕承大寶君萬方相與共理資賢良傾心寫情任舊老而卿引疾先還鄉五歷星霜復相見霜鬢蕭蕭秋滿面是時朝旭光升紫殿明相對清言良憫情留之累月未盡意歸心又欲東南征太液清泠涵碧滌楊柳芙蓉相映好鳧鷖瀉瀉弄晴波紫霧紅雲拂瓊島芳肴在俎酒在壺工歌鹿鳴續白駒君臣大義士所重心雖庭闕身江湖雁蕩峯高高不極中

有謝公舊游迹采芝劔苓可長年應在天南憶天北御製詩集

胡廣陪駕至太液池作玉砌臨無地飛甍上有天微風斜舞燕高柳拂鳴蟬岸草茸茸細池荷個個圓孰知丹禁裏別有好林泉

胡文穆公集

金幼孜和胡學士秋日陪駕游太液池遠水含秋色飛霞映晚天折荷驚白鷺倚樹聽元蟬翠合三山近波涵一鏡圓子雲才更好獨步賦甘泉

金文靖公集

西內海子中有斗牛即虬螭之類遇陰雨作雲霧常蜿蜒道旁及金鰲玉竦之上世皇齋居西內宮女過見驚什宮監以聞上曰此宜處山後何爲在此駭人乎是夜聞跋浪跳擲之聲日視之湖水破裂一道已徙去矣

談

薛蕙宮詞荷花簇錦柳垂絲一片丹青太液池御榻

獨留清暑殿宮娥空唱采蓮詞

西原集

蔣山卿宮詞十里湖光引玉泉仙娥逢上釣魚船最

憐一種天然色並向中流采白蓮

南泠集

嚴嵩賜太液乘舟詩蘭舟演漾水雲空花葉田田鳥

喚風權入瓊波最深處玉樓金殿影西東

錦山堂集

王世貞正德宮詞金鰲橋畔柳絲長舴艋船頭有柘

黃六院小兒初病酒御前親自過魚湯

弇州山人稿

董穀玉竦橋詩正愛湖光澄素練卻看人影度長虹

宮墻睥睨斜臨碧水殿翠簃遠映紅宛轉銀河橫象

緯依稀太液動秋風西華門外塵如海一入天街迥

不同

區大相玉竦橋詩雕闌宛轉度芳溪映日春旗拂綵

霓碧浪晴開天花右青山近出帝城西潭魚在藻驚

人躍谷鳥啣花近水啼惟有岸楊汀草綠長承玉輦

幸金堤

海日集

唐時升詩石鯨鬣欲乘風紫閣重重倒影中夜半

漁人燈火散起看明月出龍宮

三易齋集

承光殿南從朱扉循東水滸半里崇闕廣砌中一殿碧

瓦穹窿如蓋天貫以黃金雙龍頂纓絡懸綴雕龍綺牕

朱楹玉檻八面旋匝曰崇智殿殿後一亭金飾北瞰池

水轉西至臨漪亭又一小石梁出水中亭八面內外

皆水云釣魚臺殿前牡丹數十株名芭蕉園

西元集

日下書

卷九

早

芭蕉園在太液池東崇臺復殿古木珍石叅錯其中又有小山曲水實錄成於此焚稿甫田集

芭蕉園有宮眷法從人等至此下馬二石碑當是世宗設醮時所立金鰲退食筆記

西苑南有芭蕉園養花上供地傍有飛香浮玉二亭亭南臺曰耀臺殿曰昭和北有百鳥房虎豹圈崇禎四年

悉罷之客燕雜記

實錄成擇日進呈焚稿于芭蕉園園在太液池東崇垣復殿古木珍石叅錯其間又有小山曲水則焚藁之處也湧幢小品

五雷殿左迎祥館右集瑞館萬曆二十九年三月添扁宮殿額名

夏言臨漪亭詩綠樹陰陰翠殿寒臨漪亭上倚闌干

誰知鳳閣龍樓裏亦有青山碧水看桂洲集

陳沂芭蕉園詩雨後芭蕉死春深楊柳宮倚雲懸碧

蓋縈霧閉雕籠輦路回天上歌臺出水中忽聞人語

笑沙畔起驚鴻拘虛集

馬汝驥詩輦道山樓直宮園水殿低碧荷香檻出紅

藥晚階齊釣石蛟龍隱歌臺鳥雀啼翠華當日幸花

木五雲迷西元集

廖道南芭蕉園詩旖旎芭蕉色繽紛滿御園午陰便

鹿夢春雨罷蜂喧綠借芙蓉潤青交薜荔翻詞林曾

獻頌此日重承恩元素集

文徵明詩小山盤折翠嶺呀松桂陰陰輦道斜草長

蘭亭迷曲水雨深桃洞自飄花紫雲依舊圍黃屋青
鳥還應識翠華知是史臣焚草地文光隱隱結紅霞
甫田集

薛蕙西關遇雨詩窈窕西清內參差水殿連歸雲向
平樂飛雨集甘泉明月裁班女迴風唱麗娟龍池初
望幸來往木蘭船 西原集

由金海橋玉熙宮迤西曰櫺星門迤北曰羊房夾道牲
口房虎城在焉內安樂堂在焉成化間萬貴妃專寵孝
穆紀皇后有娠託疾居此誕生孝宗 燕史
羊房夾道舊有貞慶殿萬曆三十一年八月毀 宮殿額
名

虎城在太液池之西北隅睥睨其上而阱其下阱南為

鐵門闕而竇其南為小窰小窰內有鐵柵如籠以檻虎
者虎城西北隅有豹房 燕都遊覽志

西內有虎城畜虎豹旁有牲口房養珍禽奇獸上曰民
脂民膏養此何用遂殺虎以賜近臣餘皆縱之 崇禎遺
錄

王世貞正德宮詞窄衫盤鳳稱身裁玉靶雕弓月樣
開紅粉別依回鶻隊君王新自虎城來 弁州山人集

正德二年八月蓋造豹房公廨前後廳房并左右廂歇
房上朝夕處此不復入大內矣 武宗實錄

七年添修豹房屋二百餘間費銀二十四萬餘兩 同上
唐時給役禁中多名為小兒如花藍小兒飛龍小兒五
坊小兒是也五坊者德宗所立曰鶻坊鶻坊鷄坊鷹坊

狗坊漢有狗監正德中豹房皆是此意

穀城山房筆塵

王世貞正德宮詞玉水垂楊面面栽豹房官邸接天

開行人莫愛纏頭錦萬乘親歌壓酒杯

弇州山人稿

百獸房在虎城之後連楹南向

燕都游覽志

禁苑中四方鳥獸畢備其不可馴者盛以樊籠有鷲鳥
高六七尺諸禽獸皆畏之不知其名也獨無虎豹獅
子之屬相傳先朝皆蓄以備遊翫至今上中年尚有虎
數隻一夕上夢虎齧左足覺而腓痛疑其祟令司苑者
勿與食餓殺之內一虎甚大長丈許餓至二十四日方
死呼聲動地自是不復畜焉

五雜俎

穆天子得白狐以為異以天下無粹白之狐也今西內

有白狐居籠中甚馴

露書

陳沂放內苑諸禽詩多年調養在雕籠放出初飛失

舊叢祇為恩深不能才朝來還繞上陽宮

狗虛集

正德七年十一月詔建鎮國寺於大內西城

大政記

正德九年十月刑部主事李中上言今日大灌未收儲
位未建義子未革紀綱日弛風俗日壞小人日進君子
日退士氣日靡言路日閉名器日輕賄賂日行禮樂日
廢刑罰日濫民財日殫軍政日敝善治一無可舉蓋以
陛下惑於異端也夫禁掖嚴邃豈異教所得雜今乃于
西華門內豹房之地建護國佛寺延住番僧日與親處
異言日沃忠言日遠則用舍之顛倒舉措之乖方政務
之廢弛豈不宜哉伏望陛下毀佛寺出番僧妙選儒臣
朝夕勸講務正心誠意之學明二帝三王之道攬大權

以絕天下之奸建儲位以立天下之本革義子以止天下之名疏入不報尋降廣東通衢驛驛丞武宗實錄檣星門迤西曰西酒房曰西花房曰大藏經廠即司禮監之經廠也燕史

正德八年正月詔建延壽僧寺堂釋殿于西內經廠大政記

司禮監大藏經廠按碑記皇城內西隅有大藏經廠隸司禮監寫印上用書籍及造制勅龍箋處內有解字庫藏作房及管庫監工等處官員所居藏庫則堆貯歷代經史文籍三教番漢經典及國朝列聖御製御書詩賦文翰印板石刻于內作房乃匠作印刷成造之所其印板用久模糊則入池刷洗復用建自正統甲子歷至嘉

靖戊午世宗皇帝造元宮殿將本廠大門拆占廨宇等項雖存而宮匠出入狹隘不便隆慶改元元都拆毀其後內監展拓舊基重加修飭始于萬曆三年二月落成于五月燕都遊覽志

經廠又西曰洗帛廠曰果園廠曰西安裏門曰甲乙丙丁戊及承運廣盈廣惠廣積贓罰十庫燕史

果園廠在檣星門之西明永樂年製漆器以金銀錫木為胎有剔紅填漆二種剔紅合有蔗段蒸餅河西三撞兩撞等式蔗段人物為上蒸餅花草為次盤有圓方八角絳環四角牡丹瓣等式匣有長方二撞三撞四式其法朱漆三十六次鏤以細錦底漆黑光針刻大明永樂年製比元時張成楊茂劍環香草之式似為過之填漆

刻成花鳥填彩稠漆磨平如畫久而愈新其合製貴小
深者五色靈芝邊淺者回文綫金邊價數倍于別紅二
種皆厥製也 金齋退食筆記

正德三年五月遷甲乙丙丁等庫于內府四年八月以
新造天財甲乙丙丁等庫成欲盤移庫藏命魏國公徐
顯宗行在戶部右侍郎吳璽總理其事 英宗實錄

十庫自戊字之後不全用十干以巳者巳也是以改用
別名曰承運廣益廣惠廣積贖罰魏忠賢從甲字庫出
身遂倚任李宗政為掌庫餘九庫宗政指揮示優異
焉 燕史

樞星門迤西街南贓罰別庫之門也門傍東迤南曰蠶
池從陽德門外皆可以至玉河是河也由北安門外樂

日下舊聞卷九補遺

宮室七

嘉靖十年三月建土穀祇先蠶壇於西苑名曰土穀壇
曰帝社帝穆名大學士張孚敬尙書李時至太液池使
中官操舟濟之入見於舊仁壽宮賜酒饌出御製西苑
視穀祇先蠶壇位賦手授孚敬曰朕偶有作卿等和之
孚敬請上手書併裝成帙名曰詠和錄 嘉隆間見紀

無逸殿三間用甄寫刻大字農家忙詩一首并記東西
間作沙壁寫無逸一篇幽風亭正面用甄寫刻大字題
幽風詩一首東西兩邊作沙壁寫七月詩 論對錄

嘉靖二十七年七月西苑獻瑞穀雙穗者七十五本
臣上表賀 同上

蠶池明時宮人織錦之所今止存雲機廟故基 隆華集

箋

嘉靖十二年四月上幸西苑御寶月亭召張孚敬等同游御清馥殿翠芬亭賜茗酒錦囊詩扇紅藥花製古樂府五七言絕句各一章命和 嘉隆間見紀

內監蠹蟻房虎豹犀象各有職秩有品料如虎食將軍俸象食指揮俸不甚于秦松之大夫漢柏之將軍乎 明

周美為尚書郎封君就養京師秩滿受封父子相隨奉天門謝恩內侍引入禁苑徧觀漸臺太液之勝前以內珍日封君謝恩者蓋小况年盈八十健爽如此者乎掖送出長安門而別 震川集

田謹按登壇考周美蘄州崑山人中宣靖

二十三年泰鳴雷榜進士

乾祐閣宮中謂之北臺高八丈餘廣一十七丈磴道三分三合而上俯臨閭井繁猥畢見欽天監言風水不利議毀之天啟元年十一月十三日工部疏請得旨時吾鄉高工部道素初授虞衡司主事於次日始督掘北臺適禁中有窪地公請兼領築填即以所毀臺基積土補之享半功倍省費甚多此事本在元年而劉氏蕪史謂是二年事誤也 閩史掇遺

嘉靖二十三年施藥京師為丸凡三十五以治百病俱有湯引以白綾作袋上刻板作印云凝道雷軒施袋中貯銀五分作方片嘉靖錢七枚雷軒朝廷道號也 暖妹

筆

曹靜照言詞口勅傳宣幸玉熙樂工先候九龍池粧

成傀儡新番戲盡日開簾看水嬉紅蕉集

崇禎十七年正月二日帝於禁內大光明殿行祈禱禮

梳粧臺在太液池東小山上一名瓊華島即今白塔寺

址也西河詩話



日下舊聞卷十

城市一 中城上

京師雖設順天府兩縣而地方分屬五城每城有坊中
城曰南薰坊澄清坊仁壽坊明照坊保泰坊太時雍坊
卜時雍坊安和坊積慶坊東城曰明時坊黃華坊思城
坊居賢坊朝陽坊南城曰正東坊正西坊正南坊宣南
坊宣北坊崇南坊崇北坊西城曰阜財坊金城坊鳴玉
坊朝天坊河漕西坊關外坊北城曰崇教坊昭回坊靖
恭坊靈椿坊發祥坊金臺坊教忠坊日中坊關外坊每
城設御史巡視所轄有兵馬指揮使司設都指揮副都
指揮知事後改兵馬指揮使設指揮副指揮革知事增
吏目昔宋以四廂都指揮巡警京城神宗置勾當左右

日下舊聞

卷十

公事民間謂之都廂元設巡警院分領坊市民事即
今巡城察院也春明夢餘錄

正陽門洪武永樂時尚沿元故名麗正洪熙元年正陽
門名始見于實錄至正統二年十月行在戶部奏麗正
等門已改作正陽等門其各門宣課司宜從今名從
之北平古今記

正統己未夏四月正陽門月城成楊文敏公

關帝廟在正陽門月城之右每年五月十三日致祭先
十日太常寺題遣本寺堂上官行禮是日民間賽會尤
盛凡國有大災則祭告之廟有董太史書焦太史所撰
碑記時稱二絕萬曆末特加封三界伏魔大帝神威遠
鎮天尊音由中出未嘗從詞臣擬定也燕都游覽志

掌道經殿太監林朝神廟時最有寵漢壽亭侯封號定
朝所奏請也燕史

焦竑撰正陽門關王廟碑曰正陽門廟者祀漢前將
軍關侯作也侯廟祀徧天下而稱正陽門者為都城
作也侯名在百世封號在累朝而稱漢前將軍者侯
志也侯方崎嶇草澤中以一旅之師卒能佐漢扶將
傾之鼎摧強破敵威振天下可不謂雄哉及艱危之
際矢死不回以畢其所志此其人與孔子所稱殺身
成仁者豈有異夫古忠臣烈士欲有立而中廢者其
未竟之志鬱于生前未常不赫赫于後世矧侯之節
皎與日月爭光者哉余行天下顧瞻廟庭歎蜀至今
千三百年之事廢興磨滅者不可勝數獨侯之祠荒

邊夷徼在有所之而芸夫牧豎婦人女子咸奔走恐後可謂盛已都城自奠鼎以來人物輻輳結四方之轂凡有謀者必禱焉曰吉而後從事中間消阻異謀振發忠義以助成聖化者非細非盛德其疇能之國朝受命宅中百靈效職乃太微營室之間侯實居之儼如環衛蓋四方以京師為宸極而京師以侯為指南神其可不恭乎

詹園集

孟兆祥字允吉交河人天啟壬戌進士官刑部右侍郎崇禎十七年三月守正陽門賊至死于門下子章明崇禎癸未進士收父屍歸母何氏亦死章明與其妻王氏俱自縊

昭忠錄

孟公預製漆棺一具貯邸中致身許國蓋其素志也

韓人物志

任皞臣贊曰忠臣何求孝子之門孝子何德資父事

君嗟彼袁粲今罕厥倫惟公父子奕世揚芬

表忠烈

按天啟壬戌先太傅文恪公克會試總裁官

是科得人最盛先後殉難死者自孟公外則

有田公景猷馬公如蛟王公國訓盧公象昇

汪公喬年黃公綱王公徵衛公景瑗焦公觀

祖黃公孫茂倪公元璐王公家彥吳公麟徵

尹公洗龍公文光祁公彪佳徐公石麒華公

允誠黃公道周傳公冠馬公思理張公國維

王公錫袞李公兆其時地不同自靖一也

中城南薰坊八鋪

五坊菴衛衛集

日下舊聞

卷十

三

東西長安門通五府各部總門京師市井人謂之孔聖門有識者曰拱宸然亦非也本名公生門菽園雜記正統元年六月作公生門于長安左右門外之南英宗實錄

成化一年六月疏通東西公生門至大明溝渠各二百一十五丈東安門至南墻角溝渠二百二十五丈憲宗實錄

正統七年四月建宗人府吏部兵部戶部工部鴻臚寺欽天監太醫院於大明門之東翰林院於長安左門之東英宗實錄

宗人府在闕東吏部衙門之上西向攷玉牒所載親王二十四郡王二百五十一鎮國輔國奉國將軍七千一

百中尉八千九百五十一郡主縣主郡君縣君七千七百三庶人六百二十而未封未名與夫齊府之餘高墻之庶皆不與焉春明夢餘錄

吏部在闕東宗人府衙門之下西向同上

紫藤花二株其一在少宰右署中吳文定公手澤也其一在司廳左署中莆田方興邦古藤記畧曰吏部廳事左署有古藤一株鐵幹如椽兩兩相比盤礴輪囷而枝蔓扶踈緣攬直上不知誰所植也堂上左右廂有藤三株乃弘治六年長洲吳文定公為少宰時手植于今石六十餘年圍而挈之不及茲藤三分之一然則樹此者殆百年矣燕都游覽志

吳寬詩手種朱藤已七年長條綠架每相纏只看葉

密清陰覆忽報花多紫粉懸
下掉頭嫌一老雨餘
舒眼盼三賢從今堆字詩
還和寫入當時草木編
注吏部右廂前有朱藤一株予所種也
匏翁家藏

集

明宣宗吏部箴周官六卿其長太宰統治百寮以熙
功載漢設選部官置尚書有佐有屬代襲弗渝致治
之本實資用賢甄拔簡任爾持衡銓爾惟敬之務公
戒私善爾勿蔽才爾勿遺必黜儉邪必進忠貞甲舍
適宜治由汝興苟或貿貿弗博詢采謀面而用弗究
其內玉石不分臧否莫明治之弗興亦由汝成度德
定位乃稱任使小知大受官罔不隲精爾識鑒勵爾
正直存予于治夙夜無斁
官箴

羅欽順吏部題名記畧吏部之稱於北京始自永樂
辛丑迄今嘉靖壬午凡百有二年中間十六七年雖
仍以行在吏部稱然大政所出固無改也故今題名
之刻斷自永樂辛丑始卿佐凡七十五人其在南京
及辛丑以前之行部不與焉公來者可得而續書也
整菴集

戶部在闕東吏部之下西向
春明夢餘錄

明宣宗戶部箴君國之道子民爲先黎庶旣安邦本
植焉相古地官實爾之職均節惠和民乃衣食賦稅
有經徭役有常民之所供舊典式張惟爾卿佐暨乃
攸屬庶幾夙夜恪謹乃服民克阜殷樹藝以蕃上下
畢充何有卒殫惟公惟勤惟時惟允惟仁之溥而義

之盡秦之商鞅唐之宇文苛征暴括邦以不振爾惟
鑒茲母縱培克母詭于隨母敗于墨予惟爾任爾其
懋哉尚友古人執德不回官箴

禮部在闕東戶部之南西向有嘉靖十五年秋欽定大
報諸祀禮儀碑在寅清堂春明夢餘錄

宣德五年北京五府六部皆未建上以禮部所典者天
地宗廟社稷之重及四方萬國朝覲會同皆有事於此
遂首建之國朝典彙

宣德六年五月行在禮部成踰月上命寮屬入蒞事賜
什器百六十二刻禮部公用四字其上巳而南禮部復
析所藏書百二十部總二千八百冊以實之劉忠愍公
集

御書視日儀刻石禮部寅清堂前世廟識餘錄

禮部儀制司有優鉢羅花開必四月八日至冬而實如
鬼蓮蓬脫去其衣中金色佛一尊不知何人所植七修
類彙

明宣宗禮部箴聖人立極法天出治爲治之本莫大
于禮稽古伯夷爲虞秩宗所典三禮宗伯攸同旣治
神人亦和上下政本之地實宣教化惟我祖宗承古
之道品節制度式昭禮教幽明崇卑秩乎有序大法
大經靡不備舉咨爾禮臣夙夜惟寅秉其直清以交
神明安上治民爰及四裔祇循舊章亦義之比惟卿
暨佐予汝協恭暨厥四屬于卿率從治國去禮猶耕
無耜咸篤敬之以懋政事官箴

楊士奇勅建禮部賜宴碑畧宣德六年十月北京新作禮部成其地于大明門之東西向中爲正堂堂之側爲司務廳前爲周序爲中門爲前門正堂之後爲後堂左右爲賓客之位後爲庖庫堂序之外爲四屬儀制主客在左祠祭精膳在右鑄印在中門之左既成命京師諸司長貳咸往落之命光祿賜宴臣伏觀亦作禮部之克有司以上所居宮殿庫隘請拓地改作上却其奏暨禮部成有司復請改作宮殿且言治材已具上曰朕夙夜求民之安今天下匹夫匹婦豈皆得所而何暇於自求佚又却其奏昔大禹薄自奉而所勤者民之事所致飾者宗廟朝廷之禮與皇上聖心異世而同符矣是役也重禮爲先務而再却有

司之請聖德之大者臣謹備書之

東里集

兵部在闕東宗人府後西向

春明夢餘錄

明宣宗兵部箴部以兵名實古司馬詰是戎兵以固華夏凡厥武臣疇過叙勲乘馬在坰考牧用蕃車駕輿服城戍郵驛守經制宜皆爾之職董之以卿承以衆寮簡畀維賢庶其昭昭爾宜懋茲敬其朝夕顧諟勿忘以熙庶績書有明訓儆戒無虞茲用教寧其可弗圖怠則隳政貪則亂法毋爲泄泄毋爲沓沓職所宜爲式克慎修福祿攸集永孚于休思古良臣鞠躬盡瘁用是作箴以勵有位

官箴

工部在闕東戶部之後西向

春明夢餘錄

工部居六曹後仕進者冷局視之嘉靖間興大工添設

比曩時數倍營繕司尤盛郎中多至十餘員得驟
京堂或有先賜四品服者人始慕之而為語云馬前
雙馬後方督工郎馬前雙者棍馬後方者杙也說聽
明宣宗工部箴虞舜之世垂若百工暨于成周乃設
司空漢置水衡將作少府備物致用必謹其度我朝
建官列次六卿率屬有四各底于成凡諸繕作儀品
有秩辨其楛良去華就實凡厥有位宜慎其官順理
而治勿苛以殘山澤之利羽毛齒革金鑛丹漆暨木
與石為所當為毋耗于材逸所當逸毋殫其力毋縱
已私縱則召菑毋溺于斯溺則取敗必祇必勤必施
以公百役具宜惟爾之功其懋敬哉視古仁智率履
勿愆用保祿位官箴

鴻臚寺在闕東工部之南西向宣德元年四月建春
夢餘錄

明宣宗鴻臚寺箴祇祇萬邦咸統于一朝觀會同其
儀有秩咨爾鴻臚卿貳暨屬時維爾官必莊以肅必
考于度必協于中無簡無煩周旋雍容惟動以周惟
一靡慝敬慎爾儀庶光爾職官箴

欽天監在闕東禮部之後西向春明夢餘錄
明宣宗欽天監箴五帝之世曆象肇興建宮作式後
世襲承惟我祖宗德合堯舜天道民事允篤欽慎爾
職于斯夙夜惟寅用率厥屬咸致其勤必精推養必
審觀候庶副欽若爰及敬授行奉天道動協
予靡愆實爾之資惰慢而失災咎而隱予則汝罰勗

哉惟謹 官箴

太醫院在闕東禮部之後西向 春明夢餘錄

太醫院在欽天監南生藥庫附焉外有惠民藥局亦隸之 明一統志

太醫署中有三皇小像世廟從侍醫之請作景惠殿令大臣春秋主祀 湧幢小品

嘉靖二十二年七月太醫院三皇殿成名其殿曰景惠門曰咸濟 世宗實錄

景惠殿在太醫院之北前為景咸門門東為神庫西為神厨中奉安伏羲神農黃帝皆南面以勾芒祝融風后力牧配以儻貨季鬼臾區俞跗伯高少俞岐伯等東西廡從祀歲仲春上甲日太常寺題請禮部堂上官行禮

太醫院堂上官二員分獻仲秋上甲如之 春明夢餘錄

隆慶四年遣禮部侍郎王希烈祭三皇于景惠殿希烈

因言三皇既祀于歷代帝王廟又祀于文華東室乃又雜之醫師使共俎豆不亦瀆且褻乎且官廡中止宜有

祠不宜有殿上不欲改先帝之制報罷 國朝典彙

院署有古銅人虛中注水關畢達古色蒼碧瑩潤射日相傳從海潮中湧出者 馬安客語

三皇廟內有鍼灸經石刻元元貞初製其碑之題篆則宋仁宗御書至元間自汴移至此者 燕都游覽志

元中統中尼波羅國人阿尼哥從帝師入見帝問何所能對曰臣以心為師頗知畫塑鑄金之藝帝命取明堂鉅灸銅像示之曰此安撫王襪使宋時所進歲久闕壞

無能修完之者汝能新之乎對曰請試之至元二年新
像成開鬲脉絡皆備金玉歎其天巧莫不愧服元史本
傳

英宗御製銅人腧穴針灸圖序畧宋天聖中創作銅
人腧穴針灸圖經三卷刻諸石復范銅肖人分布腧
穴于周身畫焉竅焉脉絡條貫纖悉明備考經按圖
甚便來學於今四百餘年石刻漫滅而不完銅像昏
暗而難辨朕重民命之所資念良製之當繼乃命鑿
石范銅倣前重作加精緻焉建諸醫官式廣教詔來
者尚敬之哉實錄

黃洪憲太醫院題名碑記太醫掌醫之政令聚四方
藥材以其醫事凡邦之有疾病者使各分其屬治之
而聖濟殿舊為御藥房擇精通醫術者分番給直以
供進御子弟肄學分十三科教試而黜陟之院故有
題名碑歲久埋壞今院使朱公儒視事方新鳩工重
鐫石以示來者屬洪憲為記碧山學士集

按太醫院題名記先少保東山公為院使時
重立先少保事定陵嘗於乾清宮西煖閣切
觚奏曰聖體病在肝腎宜寬平以養氣安靜
以益精上喜命大璫陸敬書之屏當癸未殿
試先太傅文恪公名在第一臚傳日定陵顧
左右曰此老子積德也先少保平生急友誼
嘗深入詔獄救沈先生思孝海內傳之匪獨
以仁術見重當代也

翰林院在東長安門外北向其西則鑿駕庫東則玉河橋元之鴻臚署也春明夢餘錄

翰林院在玉河西岸四夷館隸焉明一統志

宣德七年以故鴻臚寺為翰林院落成諸殿大學士皆至學士錢習禮不設西楊南楊座或問之應曰此非三公府也三楊以聞上命工部設座禮部叙位次二楊始自內閣出坐諸學士上玉堂叢語

國初建官以本院為近侍衙門故公署雖在外而僚屬相聚恒在館閣洪武初建翰林院于皇城內學士而下晚朝即宿其中扁之曰詞林永樂中行在本院官仍在禁內供奉不別立公署正統七年八月詔建于長安左門外玉河西岸而東岸則為詹事府焉正堂三間中設

大學士侍讀學士侍講學士公座左為史官堂右為講讀堂首領官房在儀門之外之右嘉靖戊子始建御製五箴碑于敬一亭亭樹于堂之南左則劉文定井井之外為蓮池右則柯竹岩亭亭之前為土山殿閣詞林記京師翰林院門左右各積有飛沙高三四尺並桓樅若短墻然微風一動則坐起出入者厭之世廟中掌院某嘗令除去官僚罷謫幾空沙還積如故或以為形勢宜爾燕山叢錄

劉井學士劉定之所浚在公署後堂之左柯亭學士柯潛所建在公署後堂之右前後二間凡八楹後堂有二柏亦潛所種翰林記

柯潛既綜院章就詞林後圃結清風亭亭下鑿池蒔蓮

决渠引泉公退偃坐其中翛然若真登瀛洲者 玉堂叢

廖道南游翰林見有亭一區曰柯亭有柏二株曰柯學士柏歎曰流風遺澤令人永矢勿諼 同上

李東陽學士柏詩序翰林後堂之後有雙柏焉學士竹品柯先生所植也先生當天順甲申奉詔授庶吉士業東陽辱在十八人之列後三年爲成化丁亥先生實掌院事乃植茲柏其初僅三尺強耳及先生以少詹事終制于莆被召不起而卒越三十年柏已踰二丈鬱然對峙其風致不減于昔而幹格有加弘治癸丑東陽爲太常少卿兼侍講學士踵先生故事乃以此題課諸吉士於是顧清士廉輩二十二人賦

一歌感舊懷賢各極思致弋陽汪俊抑之有一日百匝行樹底之句悵然感之續爲一章以畢未盡之志欲彙書成帙遺先生之子中書舍人宗文因循荏苒又六七年二十人者亦已物故復多散處僅得十有餘篇勒爲一卷詩云我行樹陰日百匝雨葉風枝自蕭颯惟有諸生識我情傍人不解空嘲狎我見先生種樹年我身尚短樹及肩枝蟠江山地可縮手斡造化天無權瓊臺翠閣何森爽院柳庭花敢爭長芘蔭長留六月陰盤廻直與孤雲上材堪五鳳難爲用根到九泉終不枉零落青袍幾故人琮琤玉珮空遺響當時院長文安公柯亭劉井相西東百年遺愛豈獨此此樹欲比人中龍樹猶如此我何似已媿班白非

兒童名收襖桶有先後壽比金石無終窮下堂再拜
想顏色仰面正拂長髯風懷麓堂集

瀛洲亭在翰林院內堂之右故有隙地一區萬曆秋甃
為方池構亭中央額曰瀛洲池逼近玉河隄聞先是亦
常引河水一勺入池而今遂湮塞無敢以上請者燕都
游覽志

郭正域詩亭子傍遂瀛池通太液清秋來一夜雨瀉
作小渠聲黃離草

徐應聘瀛洲亭新池得雨詩秘閣清宵近蘭泉曲沼
開宿烟生暮雨新水長秋苔地向蓬萊近波分太液
來憑軒多爽氣疑在白雲隈八科館課

楊晉菴守隨掌翰林院院之後有巨柳數章參天蔽

日民之輸廩米者欲曝于庭患柳陰之翳之也請伐其
最鉅者公不許作伐老柳賦示意湧幢小品

宣宗章皇帝宣德七年六月賜御製翰林院箴今揭于
院之後堂朱髹榜字用金塗之殿閣詞林記

明宣宗翰林院箴廷有司言自周則然後世襲用愈
密而重策命所書兩學所資幾務之嚴于度于咨代
有賢哲博開明譏克勵翼之用光厥職咨爾儒臣朝
夕左右必端乃志必慎乃守啟沃之言惟義與仁堯
舜之道鄒孟以陳詞尚典實浮薄是戒謀義所屬出
忠乎外必存大公罔役于私昔人四禁汝惟勵之獻
納論思以匡以益以匹前休欽哉無斁官箴

嘉靖五年十月上製敬一箴及注范浚心箴程頤視聽

言勅四歲頒賜大學士費宏等宏等疏謝請勅工部於翰林院象亭立石以垂永久從之世宗實錄

七年二月敬一亭成同上

黃仲昭翰林院南新闢三圃詩玉堂有隙地清曠當南隅方春度微雨草色成葦蕪今年闢三圃於以種嘉蔬開雲作畦墉引水疏溝渠縱橫數十品生意盈階除朝來零露瀼綠葉清陰敷菜根有真味頗勝梁肉腴嚼之苟不厭百事俱可圖偉哉信名言千載當師模未軒錄

李東陽采桑堂陰詩采桑土堂陰分蠶長安郭一勞累百枚再分連數箔寧知貴富地此物能沃若采桑玉堂陰陰濃婆娑一采不樹涵筐竟日能幾何乃

知富貴地不及窮山河懷麓堂集

按今院中先師廟庭古桑尚存當即西涯所賦也

黃洪憲院中古藤歌院中古藤幾千尺不附青松不附柏前輩誰能計歲年但見鬱鬱盤盤臨峭壁孤根早已謝芳菲古色自為人愛惜霜後朝分上苑青雨餘暮帶西山碧小亭仄徑石闌干老蔓長條白日攢掣風宛轉瘦蛟舞臥雪屈強奔虬蟠君不見大夫松將軍樹昔日敷榮今何處不若蕭條此古藤年年歲歲生煙霧碧山學士集

寶善亭三楹在翰林院東偏軒牕虛豁旁臨玉河環蔭喬木學士大夫靜觀之所也燕都游覽志

翰林院尊道堂修吉堂瀛洲亭寶善亭原心亭成樂軒
大小門牕竹簾鈎俱工部器皿厥辦送翰苑須知
甲戌五月翰林院中吏舍有白燕一雙獻之內閣又池
中蓮花早開相君并以獻上溫旨諭荅之穀城山房筆
塵

萬曆二年翰林院中白燕雙乳輔臣以獻進兩宮並賞
焉長安客話

南昌張直閣位在翰苑嘗上疏請令史官行人奉使四
方各求遺書一部送國學翰林收藏得旨允行穀城山
房筆塵

國初庶吉士或在中書省或在文華堂後改置翰林
唐詩話

故事自一月朔日始賜庶吉士酒至四月晦止歲以為
常未軒集

周子義重修翰林院記長安門之左厥基南峙厥向
北拱者其位置也門之內為儀門為堂為後堂堂之
左右為二廳後堂之左右為二室學士諸寮之所登
而依也堂之兩廂有齋若干楹庶吉士之所居而習
也堂之後為敬一亭宸碑峙焉羣屬之所瞻而仰也
亭之左為先師堂羣屬之所禮而拜也交翠軒佚稿
岳正禁臆引燭詩禁城傑直已昏黃忽訝鑿輿到玉
堂直欲踉蹌趨几席其如顛倒著衣裳當牕蓮炬分
紅燄滿室蘭煤散煖香已喜恩光耀今古况將經術
侍君王類博稿

程敏政玉堂散直圖詩金殿當頭玉堂署十二朱廊
隱宮樹衣冠濟濟堂中人猶似前時起居注門下斜
連金水河石橋五壘橫蛟鼉叩閣不許外人到挾册
時見諸王過奎文上應圖書府插架連籤照今古同
游恐是十洲仙下界紛紛半塵土邇來新詔開中堂
儲材聖訓何洋洋日令三館坐羣彥應制往往催詩
章從容退食龍樓外松下傳餐解簪帶光祿之酒大
官羊終歲天厨有佳賚宮壺卓午漏未央旭日半下
城西墻出門跨馬一分手緩步不知歸路長篁墩集
沈自邠原心亭詩天地空茫茫吾生亦須臾何爲牽
世網遽令白日徂高齋掩岑寂相對惟槁梧松風颯
寒聲庭草亦已枯萬籟皆歸藏迥然見真吾人心方

寸間用之盈八區身因閒居適境與秋水俱端坐無
所營宴息聊爲娛沈修撰集

無名氏原心亭詩鬱鬱松樹枝肅肅冬日陰孤亭弘
且敞乃在鳳池潄鳳池超人寰萬籟無一音暫息塵
中轍因鮮俗慮侵端坐邈宇宙掩帙忘古今頓令羣
動祛見此方寸心金門足大隱豈必謝纓簪八科館

玉河卽西苑所受玉泉注入西湖逶迤從御溝流而東
以注于大通河者隄在東長安門翰林院東畔有坊二
署曰玉河東西隄其南北有三石梁西隄舊有高柳垂
蔭水面崇禎己巳冬城守官軍禦寒無具盡斫爲薪僅
存翰苑墻東一帶矣燕都游覽志

何景明艷曲御溝連上苑大道接平沙紫陌三千騎
青樓十萬家城中楊柳樹風起暮飛花 大復山人集

蔡羽玉河橋曉行詩太液新波出建章
轆轤聲近想宮墻殘星拂樹天橋淨隔岸啼鶯禁籞長
紫氣凝香開北極蒼龍乘日起東方
君王垂拱臨朝早銀燭光

中散鷺行 林屋集

游潛詩玉河清淺曉粼粼
綠漾平沙柳色新兩岸樓臺春似畫
紫騮風滾落花塵 夢蕉存稿

汪佃玉河柳詩御溝新柳暗如烟
萬縷長條碧可憐不是灞橋分手處
更誰攀折到離筵 東麓稿

歐大任玉河堤上見新月詩
弦月纖纖照馬蹄竹書猶把署中樓
溝前垂柳穿林影禁裏新鶯過水啼
緹

騎紛隨秦苑北外旗深護漢宮西
倦游不記長安道千里關河怨解橋
歐虞部集

王家屏玉河新柳詩水繞沙隄曲橋看
御柳眠柔條輕着雨嫩葉暗抽烟
影落澄波細陰垂畫檻偏亭亭
依漢苑遲日待鶯遷 復宿山房集

顧起元玉河詩御柳籠隄弄晚風
仙源遙接禁城中金橋深鎖臙臙月
不信銀河有路通 懶真草堂集

詹事府在皇城東玉河岸上西向左右
春坊司經局皆列署府中 春明夢餘錄

正統七年十一月建詹事府于玉河東隄
英宗實錄明宣宗詹事府箴堂堂鴻業
萬世攸傳儲副之建大本在焉
咨爾詹事爾其毗輔有貳有丞庶職咸具虞

舜之賢資于臣隣矧時育德而弗資人言行政事有體有要必謹大猷必以辰告譬如陟崇山下而升不怠以休乃躋高明爾其敬共以引以翼毋爲儉佞毋肆讒慝示爾箴規篤念勿忘克用有成邦家之光官箴

又左右春坊箴國之大本厥惟儲嗣天序所屬人心攸繫用輔厥德必于正人左右春坊惟其輔臣儲君之德曰仁與義食息言動惟道之比堯舜周孔是究是明百度以貞其德乃成玉資琢磨乃薦宗廟豈其賢才不由輔導爾端爾行爾正爾心非聖不道其慎其欽大經大猷是匡是直國有元良惟爾之績同上又司經局箴聖人之道具載經籍用理萬邦用凝庶

績田有儲高天下之本惟德之修惟道之盡凡厥典冊實實司之爾殫爾心爾正爾思堯舜之聖惟曰仁義擴而充之萬善斯備雜家者流反道自賢孟軻敬王不陳于前爾其監茲祇乃攸服日就月將是啟是沃道積厥躬而致于中克績其隆時乃之功曲學阿世古人所戒篤慎勿忘庶幾無悔同上

上林苑監在皇城東東江米巷南向永樂十四年諭凡牧養栽種地東至白河西至西山南至武清北至居庸西南至渾河禁不許圍獵春明夢餘錄

上林苑監在文德坊玉河橋西典簿廳討焉外有蕃育嘉蔬冰鑑川衡林衡良牧左典察右典察前典察後典察十署亦隸之明一統志

宣德十年二月葺上林苑監所轄冰鑑川衡典察左右
前後六署惟存嘉蔬蕃育良牧林衡四署從行在戶部
奏請也 宣宗實錄

金駕部鉉於壬午七月晦日讀邵子記其後曰甲申之
春定我進退進雖遇時外而勿內退若苦衷遠而勿滯
外止三時遠不卒歲優哉游哉庶沒我世及甲申死難
人始之鉉初以駕部巡皇城每過玉河輒留連不能
去歸語其弟鏞曰吾一見玉河若依戀不忍舍何也竟
投玉河死 三垣筆記

元寧觀在南薰坊有勅建碑 順天府志

澄清坊九舖有長壽寺元極觀 五城坊巷衢集

永樂十五年六月於東安門下東南建十王邸通爲屋

八千三百五十楹 成祖實錄

宣德三年四月新作公主府三所于諸王邸之南 宣宗實錄

四夷館在玉河橋之西永樂五年十一月始設命禮部
選國子監生蔣禮等三十八人隸翰林院習譯書八月
給米一石遇開科令就試仍譯所作文字合格出身置
館于長安左門外處之 燕都游覽志

洪武十五年命侍講火原潔譯蒙古文字譯字官隸本
院始於此永樂中學士楊榮掌其事宣德元年命本院
學士稽考課程弘治初奏准科目出身四品以上二員
提督自後提督官例用太常寺卿及少卿 翰林記

景泰三年八月改造四夷館先是譯書子弟俱於東安

門外廊房肄業至是提督譯書郎中劉文等請建館于
廊房之南隙地從之 實錄

烏蠻市在王府街之會同館 燕都游覽志

永樂六年八月設北京會同館改順天府燕臺驛爲之
成祖實錄

正統六年九月命於玉河西隄建房一百五十間以館
迤北使臣七年二月造會同館 英宗實錄

弘治三年二月英國公張懋上言京城原設兩會同館
各有東西前後九照廂房專以止宿屬國使但北館有
宴廳後堂以爲侍宴之所而南館無之每賜宴止在東
西兩照房分待褊迫不稱乞勅工部將近日拆卸永昌
寺木料改造宴廳于南館從之 孝宗實錄

成壽寺在澄清坊有勅建碑 順天府志

明照坊六鋪 五城坊巷衢街集

宋襲明照坊對雨詩章臺車馬去如流白雨霏烟拂
畫樓九陌平鋪明似練兩溝急瀉碧於油美人虹見
西山霽少女風來北里秋涼意滿襟簾幕卷宮鴉歸
樹夕陽收 燕石集

皇城東燈市大街嘉靖二十九年立戎政府統以勛臣
一員曰總督京營戎政佐以文臣一員曰協理京營戎
政營制有三中曰五軍東曰神樞西曰神機五軍營析
爲營十六神樞營析爲營十神機營析爲營九凡三十
一營聯之則三大營又聯之則總曰戎政府崇禎十六
年八月以襄城伯李國楨總督京營戎政國楨請上御

書營額上為親書共武堂賜之 春明夢餘錄

法華寺延禧寺在明照坊俱有勅建碑 順天府志

迎禧觀亦在明照坊有勅建碑 同上

保大坊四舖有府軍前衛府軍左衛羽林左衛金吾左衛金吾前衛金吾後衛虎賁左衛迎禧觀拾餘旛竿寺 五城坊巷衢集

燈市在東華門王府街東崇文街西亘二里許南北兩廛凡珠玉寶器以逮日用微物無不悉具衢中列市某置數行相對俱高樓樓設氍毹簾幙為宴飲地一樓每日賃直至有數百緡者夜則燃燈于上望如星衢市自正月初八日起至十八日始罷鬻燈在市西南有冰燈細剪百綵澆水成之按宋時燈市乃從九月菊燈始今

止正月內數日耳 燕都游覽志

石崑玉燈市一首燈市百貨聚類聚逸分局雜沓掩塵埃穹窿象山谷波斯細舉名最下亦珠玉滿城恣意觀履鳥時交觸側肩趁友朋轉眄遺童僕樓上樓下人徙倚自相矚重器與嬌容迴還日不足倘非挾厚藏焉用空馳逐惟我獨閒行輝煌聊飽目佻佻白面郎囊裏金如粟訪古併探奇十僅償其六本擬快于心旁觀客有蹙為君話所從原出巨家積向購此場中而今在此鬻佇看市道間何事無翻覆物類火傳薪人寰風轉燭拚諸海陸珍權與豪華畜姑數杖頭錢來酣春酒熟 同上
范景文詩御溝春暖漲冰絲風煖沙次日影移珠綴

九微光燦爛張燈不待月高時王孫約隊簇金貂玉
勒奇驄綺陌驕文具珊瑚看不盡東華門外市三條
朱樓一帶鬱嵯峨陣陣香風襯綺羅龍燭薰風喧不
夜人街到處月明多月明處處度笙簫春色分明念
四橋有酒勸君須盡醉百年能得幾元宵水餐堂稿
汪曆賢詩長安燈市晝兼宵游女爭呈馬上腰踏遍
燈光不歸去更留同伴走三橋錦鞵朱勒未曾收猶
俟燈殘續冶游好向高梁看柳色清明上巳在前頭
燕都游覽志

賀世壽燈市詞冰條未破玉河流春氣先蒸市上樓
錦簇花團喧笑語幾家都尉幾通侯九微燈影六街
連景色仍如萬曆年只有官人歸去早酒壚不待月

中天同上

劉侗竹枝詞田家歌舞魏家漿海澱園林恭順香桃
李莫分先後種恩波一片是春光帝京景物畧

王應遴燈市詩千官休沐遂良期不見牙牌挂阿誰
聞說昔年三學士召來殿上撰燈詞星毬蓮炬半空
懸火歎梨花罩酒筵莫道米珠薪桂地誰人肯惜買
燈錢哥窰倭漆載盈車估客蕃兒莫自誇寶玩聖明
原不好故令吉市在東華燕都游覽志

徐穎燈市詞東掖門東燈市開千官萬姓擁塵灰悔
不多錢買身貴鞍籠喝道下驢來同上

王驥燈市曲迎春纔罷更喧騰盡說繁華較舊增國
事正當宵旰日君王大內不看燈逐隊人過燈市來

喧喧街鼓動成雷若關豐儉應如此一歲何妨月一
回出炕新花不耐寒裝來盆盎也難觀衆中最苦惟

檀栾壽字香烟屈曲蟠

同上

幡竿寺本永樂年建日給光祿粟米三石後府屬衛月
辦柴薪萬二千五百觔煮飯施貧民

武宗實錄

嘉靖元年正月四川道監察御史鄭木公請出錢賑濟
京師凍餓窮民戶部議朝廷舊設養濟院窮民各有記
籍無籍者收養蠟燭幡竿二寺衣布薪米厨料約歲費
萬金所存活甚衆今院籍混淆或以丁壯竄名或以空
名支費二寺復設內官校尉乾沒罔利民無所依弊端
坐此請委官查記籍革虛冒其二寺添設內官校尉盡
行罷減惟遺光祿寺及宛大二縣官以時更理其事合

用柴斤令於臺基厰關支五城兵馬日拊視道路窮民
使就食二寺命如議行

世宗實錄

崇真萬壽宮在府右蓬萊坊元至元中建翰林學士王
構爲記真人張留孫吳全節相繼居此俗名天師菴

一統志

延祐七年七月命元教宗王張留孫修醮事于崇真宮

元史英宗紀

世祖混同海宇而神德真君張公入觀上悅卽兩都皆
建崇真宮居之號公天師

吳文正公集

吳澄瑞鶴記孝定元年春左丞相傳旨命元教大宗
師吳全節於崇真萬壽宮虔告于天有所有報元教
之士供給于齋宮者千人將事之時有鶴自東南來

者三俯臨祠壇飛遶久之乃去成事之旦有鶴自青
冥下者二復臨祠壇飛鳴久之而上瑞應上聞有旨
命詞臣撰錄若稽諸古一變之樂能致羽物九成之
韶能來儀鳳况聖天子敬天之誠乎誠之所感何所
不至鶴者羽物之族儀鳳之倫其致其來固其宜爾
同上

葛邏祿迺賢題崇真宮陳鍊師壁間竹梅邀倪仲愷
同賦空谷天寒雪如堵短篷載酒滄江浦繫船偶傍
竹籬根一樹梅華纔半吐別來京國久相思夢斷愁
闌畫角吹忽見新圖寫幽趣令人却憶剡溪時寄語
南城倪博士取琴對此彈秋水中秋月上不須歸共
倒清尊醉花底 金臺集

張翥中秋玩月崇真萬壽宮西風吹月出雲端松柏
流光繞石壇上國山河天廣大仙家樓觀夜高寒似
聞玉杵鳴元兔疑有瑤笙下翠鸞只把酒杯供醉賞
不知零露滿金盤 蛺蝶菴集

曾榮崇真萬壽宮訪葛太常作崇真宮闕禁城東舊
說真人住此中嵐去縵山虛夜月鶴歸華表怨秋風
飛花入戶丹房靜古木垂蘿碧殿空一笑忽逢勾漏
令將因暇日問叅同 巢暉集

按元有二崇真宮一在上都易之詩所云珠
宮灤水上是也一在大都今之天師菴

仁壽坊八舖有府軍後衛金吾右衛隆福寺仰山寺
城坊巷衢集

景泰三年六月命建大隆福寺役夫萬人以太監尚義陳祥陳謹工部左侍郎趙榮董之閏九月添造僧房四年三月工成寶錄

景泰五年四月新建隆福寺成車駕擇日臨幸有司已夙駕陰道太學上濟寧楊浩上疏陛下即位之初首幸太學海內之士聞風快覩今又棄儒術而崇佛豈可垂範後世耶儀制郎中章綸亦言以萬乘之君臨非聖之地史官書之傳之萬世實累聖德上覽疏即日罷行時又有太學生西安姚顯疏言王振竭生民膏血修大隆興寺車駕不特臨幸請自今凡內臣修葺寺院悉行拆毀以備倉廩之用時不能用自正統至天順京城內外建寺二百餘區大臣諫官不言而二生言之一時名震

中外國朝典彙

大隆福寺爲景帝所建至撤英宗南內木石助之未幾又從山西巡撫都御史朱鑑言謂風水當有所避忌乃命閉正門不開禁鐘鼓聲又拆寺門牌坊所謂第一叢林者而無救于禍難成化間又以妖僧繼曉建護國大永昌寺致勞憲宗親幸不逾時曉誅寺毀二寺皆偏近禁籞隆福今尚存而永昌無寸椽片瓦矣野獲編京師鉅刹大興隆大隆福二寺爲朝廷香火院餘皆中官所建菽園雜記

日下舊聞卷十終

日下舊聞

卷十

巨

日下舊聞卷十補遺

城市一 中城

天順元年五月京城大風雷雨雹拔木壞屋走正陽門下馬牌干郊外曹吉祥之門巨樹皆折石亨宅水深數尺京師震恐古今奇聞類紀

北京正陽門無敢出喪餘皆不禁大明門雖空棺亦不許過各門空棺不許昇入禪史彙編

唐宋禁中亦許乘馬今制自兩長安門東西華門外過者皆下馬雖相臣亦然震澤長語

今世官司各有俚語以寓譏評如在京兵部四司曰武選武選多恩多怨職方職方最窮最忙車駕車駕不上不下武庫武庫又閒又富春風堂隨筆

劉麟為工部尚書奏建節慎庫與臺臣同典出納自是財無濫用萬姓統譜

嘉靖八年二月工部尚書劉麟上言本部設立衙門之時原有大庫一座規制頗闊在本部之後有堂二重并大牆限隔但有中正大路前通臣等相度本庫之北循鑾駕庫外牆而行正與東朝房一間相對查係兵馬司官住其房年久損漏可以改為門道庫官庫吏亦不必增添本部所屬皮作局其務甚簡可以改為庫官架閣庫吏并匠科典吏俱可改為庫吏庫門責委虞衡司掌管其未盡事宜聽臣等臨事損益具奏得旨允行麟又上言庫藏既立當揭額定名以垂久遠本庫所貯本以奉國之公似當名曰奉公之庫若求設庫本意不宜濫

興工作以節為本不宜橫取存出以慎為尚名曰節慎春明夢餘錄

孫氏春明夢餘錄謂翰林院本元之鴻臚署焦氏玉堂叢語載宣德七年以故鴻臚寺為翰林院考元史百官志止有侍儀使無鴻臚所云故鴻臚寺當是永樂年間所建爾瀛洲道古錄

建置官署必立土穀祠翰林院所祀則昌黎伯韓子也古稱鄉先生歿而祭於社夫以土穀名祠亦祭社之義宜以鄉先生主之京師燕地竊謂祀昌黎伯不若易以常山太傅嬰也西神脞說

第三廳史官廳也又曰槐廳即今翰林院正廳之西偏史官所居是也儼山集

永樂二年始選進士楊相等為庶吉士就文淵閣進學
宣德九年命於翰林院讀書以後或間科一選或連科
屢選或數科不選或合三科同選或重閣殿試卷取選
或限年三十五以下或不限年吏部職掌
教習庶吉士翰林院行戶部給燈油錢兵部撥皂隸刑
部給紙劄工部撥房屋順天府給筆墨光祿寺給酒飯
明會典

蕭端蒙敬一亭頌維皇御寓建丁千民聖敬日濟一
德孔純乃作訓辭垂之世世乃勅堅砥用昭勿替誕
隆厥嗣有亭覆之倬彼雲漢昭回于茲維亭翼翼萬
世之式維碑峩峩永言無泐同野集

無錫茹文中居京師之高坡衙年百有十歲英皇復

凡之年召見便殿予冠服帶履宴顯于屏命公卿造
其居賀之真珠船

崇真萬壽宮有五色薔薇是間間吳人手持葉曉集

玉祖常崇真宮西梨花詩春日梨花下相逢把臂行

香痕憐粉白酒暈惜紅輕影動簾穿燕聲來樹度鶯

共當持一醉莫待鬢華生石田集

况贊張尊師祠醮致瑞鶴詩我識白雲君仙有赤松

子仙署閤清巖社公隨役使步虛禮初日飛神謁鈞

天時有五白鶴飛飛送香烟手栽千樹桃風吹劫灰

燼避世星壇西深山聞清磬倏來密霧集忽逐冷風

還定裏遺瑤瑟空中鏘珮環清閣

國朝翰林院設于長安門外為齋宿委積之所內有東

閣學士聚焉為朝退會揖之地史館為講讀史官所聚
集皆無公座至修史之日旋設十館于東角門之右事
竣去之震澤長語

元時翰林院以金兀术第為之以陽楚公詩翰林老屋
勢深雄猶是金家兀术宮是也瀛洲道古錄

典福院在都城保大坊北其主僧尼舍塵至元中平章
政事王公毅樞密副使吳公瑄福院宣慰使李公果始
買今院地至大德中平章政事賈公與其夫人林氏引
見于皇后下教出財帛建其殿曰慈尊延祐五年院告
成奉旨禁護掌教者錫名清修妙行以褒美之清容

吳激題燕山驛壁風流子詞書劍憶游梁當時市底

處不甚寡念蘭苕嫩葉向吳南浦杏花微雨窺宋東
墻鳳城外燕隨青步障絲惹紫游韁曲水古今禁煙
前夜暮雲樓閣春草池塘回首斷人腸年芳但如
霧鏡髮已成霜獨有蟻尊陶寫蝶夢悠揚聽出琵琶
琵琶風沙浙瀝寄書鴻雁烟月微茫不似海門潮信猶
到溇陽庚谿詩話

大醫院醫士分十三科循元醫學之舊也十三科者大
方脈雜醫科小方脈科風科產科眼科口齒兼咽喉科
正骨兼金瘡科瘡腫科鍼灸科祝由書禁科其設立醫
學蓋從太醫院大使王猷副使王安仁之請其程試科
目每三年一試期以八月中選者來春二月赴大都省
試其法考較醫經辨驗藥味合試經書則素問難經聖

濟錄本草千金翼方也元惟重其選故名醫特多明則
試醫士不過論一篇歌訣一首而已人多忽焉不以爲
意此華亭唐文恪公有京師無良醫之歎也 緇素錄
詹事府署在玉河之東西向臨玉河門二重中堂五楹
堂後屋三間南北夾窻連後堂其旁孔子廟前松二
株頗奇古中爲圓殿迴廊前後共二十八間左右春坊
司經局前後各有堂三楹又有科房宴房印書房歲久
盡毀矣詹事府題名碑一崇禎十二年十一月立詹事
黃錦撰文左春坊題名碑一萬曆三十四年二月立少
詹事全天敘撰文主簿廳題名記一碑已殘闕失撰書
人姓氏 玉河繼馬記

黃錦詹事府題名記詹事各助十泰應劭曰詹省也

給也言給事太子之官也明建大本堂 御經籍名
四方名儒教太子諸王或於文 三殿分直進講上亦
時時賜宴賦詩然多兼以勳舊洪武二十二年始置
詹事院起兵部尚書唐鐸居之後四年改名府永樂
二年儲位初定以吏部尚書蹇義兵部尚書金忠兼
領是職而印篆亦以是年給今所循用者是也於是
兩坊經局並擇文學大臣爲之極一時之選正統七
年改府署於玉河之東隄其制亦因時損益詹事總
理一府之事秩正三品少詹事協理府事秩正四品
主簿與文移秩從七品錄事佐之秩從九品舍人職
通展謁品與錄事同皆有常員而府丞及兩坊大學
士司直司諫等官不恒設較書正字今爲史局中書

以兼官崇禎己卯春錦承乏縮篆與井研陳公演晉
江蔣公德璟同登斯堂歎曰自永樂迄今二百七十
餘年矣前賢官於是者姓名或湮滅而不彰豈非明
時一闕典哉適有纂修會典之役於是請之秘閣出
典籍叅攷之補闕訂譌差次先後會陳公有掌院之
命錦亦於是冬量移禮部右侍郎終始其事者蔣公
之力也嗟夫天下事何者不成於協恭和衷哉試履
斯堂一爲寓目姓氏爵里世代皆具又從而品隲其
賢否不亦昭代今昔得失之林乎同上
全天敘左春坊題名碑記左春坊官制定自洪武十
有五年設左庶子一人正五品左諭德一人從五品
左中允二人正六品左贊善二人及左司直郎二人

從六品至十八年領以大學士一人正五品二十九
年增其屬左清紀郎一人從八品左司諫二人從九
品今官不常備亦無定員蓋國初之左春坊卽今文
華殿東廂也直廬在禁乃得與殿閣並置大學士今
坊署則與詹事府並建于玉河東隄始正統七年也
坊署故無名萬曆甲辰予承乏縮篆爰考掌故書
諸公爵里捐貲樹石備闕典焉京師故事宜永樂定
鼎後得書茲書坊洪武者志其始庶足徵也不書十
五年以前者官制未定也凡本坊職事與詹事翰林
互兼者畢書以右坊攝左以左坊領局者附書惟以
坊銜貳國子監掌南院不蒞坊者不書同上
景惠殿建于太醫院上祀三皇配以勾芒祝融風后力

牧而附歷代醫師于兩廡東廡一十四人僦貸季岐伯
伯高鬼更區俞跗少俞少師桐君太乙雷公馬師皇伊
尹扁鵲淳于意張機口廡一十四人華佗王叔和皇甫
謐葛洪巢元方孫思邈韋慈藏工水錢乙朱肱李杲劉
完素張元素朱彥脩祭以春冬仲月上甲日
唐秘書省壁有薛稷畫鶴郎餘令畫鳳賀知章草書宋
初玉堂後廡二閣悉畫烟嵐曉景北壁則董羽水巨然
山屏風則燕肅山水易元吉畫猿及狻追南渡後學士
院地迤皇城號為窄隘然紅蕉畫壁山水嵌屏其中石
渠石橋蓬巒鶴砌且有松坡菊徑蘭畦橘洲藥洞無不
雜植花果蓋著作之庭似宜與尋常官舍稍別明之翰
苑雖堂鑿池引土河橋水時蓮而棠梨桃李之屬未有

一亦異乎李肇之志陳之錄矣

蓉湖日纂

曰京師達于四方設有驛傳在京曰會同館在外曰水
馬驛并遞運所北京會同館永樂初設三年併烏蠻驛
入本館正統六年定為南北二館北館六所南館三所

明會典

北會同館在澄清坊大街東正統六年蓋造弘治五年
改作共房屋三百七十六間南會同館在東江米巷玉
河橋西街北亦正統六年蓋造弘治五年改作共房屋
三百八十七間

兵例

北京工部廳前有鐵軛相傳為石季倫家舊物庫中有
玳瑁簾橫數尺其長倍之四旁縫以錦繡又有玳瑁席
經緯相錯若莞與蒲不知何代物先君子為屯田郎日

嘗言之 鴻一亭筆記

李先芳再過玉河隄作馬蹄日日逐紅塵白髮青山
應笑人昨日玉河隄上過杏花開盡不知春 東岱山房稿

京城井水多鹹苦不可飲惟詹事府井水佳汲者甚廣
取妹由筆

嘉靖六年六月十九日夜京城雨電交作次早東江米
巷大街南李學等家房上拾有銅錢八十四文一一璧
瓦隴中御史張璠具奏錢進入庫 成菴漫筆

崇禎十七年正月大學士李建泰請以家財佐軍自往
辦賊帝甚苦曰卿若行朕當倣古推轂禮遂以是月二
十日以特牲告廟廷授尚方劍諭以二十六日行遣將

禮至期車駕登正陽門官軍旗番自午門外排列至正
陽門旌旗金鼓甚盛建泰叩頭帝慰諭再四即賜坐列
席張宴共一十九席東文臣十三人為三行西武臣六
人為一行御席居甲酒七行帝親賜建泰酒三杯并以
杯賜之復自撰勅御筆親灑龍箋即於門上用寶內臣
為建泰挂紅簪花鼓樂導前方面出 山書

鄒德溥京營戎政府題名記國朝業以錦衣諸衛衛
宮禁矣而京營之設獨主巡徼彷彿漢南北軍相制
而所謂班兵取諸山東河南中都又倣漢調三輔
之規焉然高皇帝故以衛兵分隸五府獨有五軍營
爾自文皇帝聚兵北伐歸而結營團操始設三大營
曰五軍曰三千曰神機營以勲臣二人提督之而不

為開府置冢也當此之時蓋有勝兵四十萬稱最勁
焉凌遲至于已巳之變營務弛矣於是于肅愍更簡
驍銳十五萬分為十營而訓練之命曰團營而其餘
者為老家營蓋一變矣當時仍用勲臣提督蒞以大
司馬其後益團營為十二而提督如故正德初至用
中貴人參之號曰監鎗而戎務滋廢焉嘉靖中乃設
東西官廳簡驍銳六千人為聽征又一變也蓋自三
大營選兵為團營團營選兵為東西廳有東西廳而
團營又與老家軍等矣則積弊耗之漸也肅皇帝深
懲夷戍之變詔撤中貴人盡罷提督東西廳復設三
大營為神樞并舊五軍神機為三特設提督勲臣一
人為大將又命文臣一人協理之則今所謂戎政府

也蓋舉十餘萬眾而統于一自開國以來兵權未有
若斯之重已顧趙文貞上言兵權獨主強者挾之可
虞弱者引嫌而不敢振非強兵固國之術則請倣祖
宗分府意錯置五營各擇一將董治之而大臣以時
巡燧校閱焉乃行之三日見謂號令不一而復議專
統豈分合於時固各有當與抑自有要領在而不係
乎制之分合與臨淮侯李公言恭少司馬辛公應乾
籍錄前任人姓氏勒之石而屬余記營制興革之畧
焉夫訂謨竭智為國揚武壯士之槩也精白一心捍
衛王家蓋臣之軌也執節壯猷以功德自垂不朽哲
人之致也繼斯任者觀於是碑亦可以悠然興矣吉
州人文紀畧

